

**NATIONAL ASSEMBLY OF
SEYCHELLES**

*Wednesday 14th September,
2022*

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou *staff* ki pe asiste nou. Bonzour nou bann oditer, telespektater ki swiv nou, byenveni pou nou travay ozordi. Avan nou re pran travay lo *Bill*, Onorab Sandy Arissol in demann mwan pou kapab adres en pwen, *matter of privilege*. Onorab Arissol, ou annan laparol.

HON SANDY ARISSOL

Mersi Mr Speaker. Bonzour tou bann Manm Lasanble Nasyonal. Bonzour tou bann *staff* Sekretarya e tou dimoun ki pe ekout nou dan lakour.

Mr Speaker, mon ti anvi ki mon *raise* en *matter of privilege* koman en Manm FPAC, parske mon santi poudir mon privelez i ganny afekte koman en Manm

FPAC e koman en Manm Lasanble a sak fwa ki *Leader* Lopoziyon i *challenge* bann Minis, oubyen i *challenge* nenport ki endividi an servan Komite FPAC.

Mon ti a kontan i al dan rikord ki FPAC nou en Komite parey Konstitisyon i permet nou, me selman nou *Chairman* i kontinyelman vin dan Lasanble Nasyonal piblikman e dir i demann Minis lo non FPAC, li koman *Chairman* FPAC pou li ganny sa bann lenformasyon, pou ganny sa bann detay, mon krwar i enportan pou nou met li kler, poudir Komite FPAC i konpri plizyer nou, e 7 nou parey nou Konstitisyon anba Lartik 104 (2) i dir ek nou Mr Speaker.

Nou konstitisyon i fer en provizyon pou annan en Komite ki apel FPAC. E dan Lartik 104(2) i dir bann Manm en Komite permanan Lasanble ouswa lezot Komite ava otan ki i pratik, reflekte lafors bann parti politik ek bann Manm Endepandan dan Lasanble, me otreman zot ava ganny regleman dapre lord permanan.

E Lartik 3 i dir nou, 141(3) Mr Speaker, Pou ki sa Komite, ki FPAC ki pe koz lo la. I desarz son fonksyon avek lefikasite, en Komite permanan

ouswa lot Komite ava kapab apel enport dimoun ki sa Komite i krwar ava kapab asiste sa Komite dan performans son fonksyon. E sa Komite ava annan drwa devwar e privelez Lakour Siprenm.

Mr Speaker, nou Konstitisyon i fer provizyon pou Komite. E dan sa Lartik la mon krwar in mansyonn 5 fwa mo 'Komite.' Zis pare nou *Standing Orders* 88(3) i fer referans avek *Finance and Public Accounts Committee*. Dan 88(3) i dir "*The Committee shall have power to summon and examine person and records to take evidence.*" I koz lo '*The Committee.*'

So, mon ti anvi met sa lo rikord parske mon swete ki nou Komite nou kontinyen fer sa travay ansanm koman en Komite, e si i annan okenn Minis ki nou bezwen ganny lenflasyon, nou bezwen fer li a traver nou Komite. E se pour sa rezon nou annan bann manm Sekretarya ki atase avek nou Komite. Zisteman pou zot kapab rikord, anvoy bann let, fer korespondans e pou nou kapab fer sa travay ansanm koman en Komite anba gidans nou *Chair* ki Onorab Sebastien Pillay.

Avek sa detrwa mo, mon ti a kontan remersi ou Mr Speaker.

MR SPEAKER

Mersi. Onorab Arissol in prezant mwan son bann *clause* dan Konstitisyon e dan *Standing Orders*, e mon krwar i ase kler. So, mon sipoze *Chairman* Komite i a kapab note e *act accordingly*.

Onorab Pillay ou le adres sa pwen?

HON SEBASTIEN PILLAY

Mersi Mr Speaker, avek ou permisyon mon ti a kontan fer en *personal explanation as Chairman FPAC*. Ler mon'n fer mon resers e mon'n regard lentansyon Lasanble Nasyonal a sa moman, pou met *Leader* Lopozisyon koman *Chairman FPAC* e mon'n osi ekout Prezidan Larepublik resaman dan son *press conference* - mon pa pou refer dan son *press conference*.

Me sa ki kler i ki nou pou bezwen determinen koman en Lasanble, ki privelez ki mon annan koman *Leader* Lopozisyon ki pe *Chair* sa Komite, ki sipoze pe *act* koman sa *critical friend* pou Gouvernman, pou fer sir ki Gouvernman i gard bann depans annord.

Nou annan nou en lenpas an se ki konsern *FPAC*, par lefe ki nou *Standing Orders* ki en

ekstansyon Konstitisyon, i prevwar ki se Dirizan Lopozisyon dan Lasanble ki *Chair* sa Komite. E lentansyon met Dirizan Lopozisyon *Chair* sa Komite, se pour ki nou kapab demann e kestyon serten size ki dan letan normal bann Manm ki sorti dan parti mazoriter, pa pou kapab fer li.

Mon pa pe *impute improper motive* lo sa bann Manm, me mon pe dir ki zot pa pou kapab fer li. Prezan mon vin lo mon bann *request* pou lenformasyon.

Mr Speaker, mon oule met lo rikord ki napa a en moman ki mon'n *instigate* okenn *public hearing or meeting* - mon annan *witness* la - san ki mon *seek blessing* oubyen *approval* tou manm mon Komite. Sa ki mon demann bann Minis pou fer, atraver ou e mon fer sa toultan atraver ou, menm si mon *Chairman FPAC*, se pou zis fer ki bann Minis ki vin devan Lasanble i *provide* bann lenformasyon ki Lasanble pe rode, an relasyon ek bann size ki'n vin devan zot.

Mon krwar nou'n etabli en prensip, en baz lo ki manner sa i ganny fer e napa naryen mal avek sa. Me sa ki mon ti a kontan ou reflekte lo la Mr Speaker, ler ou'n pran konsiderasyon sa bann diferan

konponan Lalwa e Konstitisyon ki'n ganny met devan ou, mon ti a kontan ou pran konsiderasyon bann diferan ziridiksyon kot i annan en dirizan Lopozisyon ki *Chair FPAC*.

E ki rol sa Dirizan Lopozisyon lo sa *FPAC* e aköz koman dirizan Lopozisyon mon bezwen, i mon devwar pou promot serten pratik ki meyer dan lafason ki zesyon finans piblik i ganny fer. Mon remersi Onorab Arissol koman en manm mon Komite pou son komanter. Mon apresye ki in fer sa komanter e mon *welcome* okenn komanter ki okenn Manm *FPAC* i annan pou fer, lo fason ki *FPAC* i fonksyonnen. Tousala i dan laliberte lekspresyon e i dan lentere *improve* lefikasite mon Komite.

E mon remersi Mr Speaker, pou donn mwan sa letan pou fer sa.

MR SPEAKER

Mersi Onorab Pillay. Nou pa pou al pli lwen avek sa, mon krwar lentansyon konstitisyon e *Standing Orders* i kler e i pa al an dezakor avek ou rol koman *Leader* Lopozisyon. Mon krwar ou rol koman *Leader* Lopozisyon e *Chairman FPAC* se pou diriz travay sa Komite. E mon sipoze sa ou kapab fer. Sel

keksoz se modifye ki kalite *statement* ou fer dan Lasanble letan i konsern responsabilite Komite. Mersi. Mersi pou lev sa pwen Onorab Arissol.

Ah, zis dernyen pwen, mon mazine sa i kapab aplik pou tou Chairman Komite, i en bon pwen pou zot *take onboard* la *at this point*. Mersi bokou.

Madanm Raporter mon a demann ou pou rapel Vis-Prezidan e *Attorney General* pou nou kontinyen.

Bonzour Vis- Prezidan Ahmed Afif e bonzour *Attorney General*, Frank Ally. Mersi pou zwenn nou ankor enn fwa. Nou a termin deba lo *TRNUC (Amendment) Bill*. Mon mazine bann *Leaders* pou anvi ganny zot privez ganny dernyen *round* parol. Alors mon a demann Onorab Sandy Arissol pou pran laparol pou son entervansyon la.

HON SANDY ARISSOL

Mersi Mr Speaker. Ankor enn fwa bonzour Minis avek *VP* e bonzour tou bann dimoun ki pe ekoute. Mr Speaker, devan nou i annan en Prozedlwa ki pe rod en lamannman, sa se *Truth, Reconciliation and National Unity Commission*. Zot pe rod en ekstansyon parey nou dir, pou zot kontiny sa travay ki zot pe fer. E i annan plizyer

dimoun in donn plizyer rezon ;- plizyer Manm in donn plizyer rezon aköz zot bezwen sa ekstansyon e aköz zot pa bezwen sa ekstansyon.

Mr Speaker, sa Komisyon letan ti komanse, ti komans avek 7 manm *Commissioners* e la si mon pa tronpe i reste 5 zot, e mon mazine avek lakantite travay ki zot in fer, lakantite ekout ki zot in ekoute kekfwa travay pou sa 5 manm i bokou. Alors senpleman zot pe demann avek Gouvernman pou donn zot sa ekstansyon pou zot asire ki tou keksoz ki'n ganny dir i ganny minite, i ganny rikorde en fason ki sa rapor final ki ava soumet avek Prezidan, pa ava kit naryen deryer, prenon an kont menm i annan 5 zot e letan ti komanse ti annan 7 zot.

E sa i fer ki bann dokiman, tou lenformasyon, tou bann dokiman i ava annord, e i ava la prezan pou ki lepep Seselwa ki pe swiv, ava konn egzaktman kwa ki sa travay ki zot ti pe fer.

Mr Speaker, letan mon lo sa pwen, souvandfwa letan nou koman en Lasanble Nasyonal nou ganny *recess*, e Lakour osi i ganny *recess*, dimoun i demann nou aköz nou ganny *recess*? Be Lasanble i Nasyonal i ganny *recess* zisteman pou

nou permet nou bann *staff*, *Parliamentary Reporters* ki travay ek Lasanble Nasyonal, ganny sa posibilite pou zot tip tou bann deliberasyon ki Manm Lasanble in fer, met li annord, *compile* li, kit li la. Sanmenm sa ki nou apel *verbatim*.

Parfwa dimoun i dir nou ganny recess 3 fwa par lannen. Me nou ganny *recess* pa pou asiz dan lakour. Me senpleman pou nou kapab donn loportinite nou bann manm *staff* ki travay sanses avek nou, pou zot met sa bann dokiman annord. Kit li la pou nenport ki dimoun ki anvi serten lenformasyon lo sa ki bann Manm Lasanble in fer pandan *recess* i ganny tipe, aranze, met annord, gard rikord.

Se pour sa rezon Lasanble avek Lakour zot ganny sa ki zot apel *recess* konpare avek lezot Minister oubyen Departman Gouvernman.

E alors letan *Truth* pe demann nou en ekstansyon dan son letan, nou pe zis swete zot pe fer egzaktman parey sa ki nou, nou fer letan nou ganny nou *recess*. Zot pe met tou zot bann dokiman annord, asire parey nou dir, poudir tou keksoz i la e prezan.

Mr Speaker, sa *process* pou mwan in en *process*

ekselan, e mon rapel letan Lalwa ti pas dan Lasanble Nasyonal, mwan mon ti pe asiz lot kote, mon ti dan Lopozisyon e parti mazoriter ti lo sa kote, e ti annan sa konsansis bi partizan parey mon'n tann koz lo la yer, pour ki sa Lalwa i kapab vin anfers. E sete Mr Danny Faure koman Prezidan sa letan ki ti *assent* sa Lawa parey nou dir, donn li son *full power* pou li kapab vin an fonksyon.

Mon rapel letan nou ti pe debat sa Lalwa, plizyer lopinyon ti sorti e mon rapel Onorab Basil Hoareau sa letan ki ti pe reprezant Gouvernman, parti mazoriter, letan li i ti pe koz lo sa proze Lalwa i ti menm plere dan Lasanble Nasyonal. Parski i ti pe eksplik nou e i ti pe mazin son soufrans ki son prop fanmir, spesifikman son gran papa ti pas atraver sa letan, anba Gouvernman ki ti la - sa letan.

Me si en Manm Parti *US* sa letan, ti plere, sa i montre nou poudir sa Proze Lalwa ouswa sa *telenovela* ki *SPPF* in fer referans avek, ti sitan enportan pou nou pei Mr Speaker. Ti enportan.

E se pour sa rezon ozordi mwan mon *happy* avek sa *process*, parski tou nou Seselwa - tou nou Sesel in

ganny sans vin devan, vin dir ki i ti pas atraver. Eksplik son soufrans e i menm annan manman ozordi ki'n mor dan nou pei, zanmen in konnen ki'n arive ek son zanfan - zanmen in konnen kote son zanfan in ganny antere. Zanmen in konnen kote son zanfan in ganny zete. E lafanmir in reste san en larepons.

Me pou mwan sa, sa legzersis in enportan Mr Speaker. Parski sa legzersis in osi enportan pou mwan, parski in donn nou bann zenn loportinite pou zot konpran, ki sa parti ki ti o pouvwar pandan tou sa letan ti ape fer avek nou bann zenn. Ki ti ape fer avek nou bann papa. Ki soufrans nou bann manman ti pe pas atraver. Ki soufrans nou bann vye dimoun ti pe pas atraver, letan i ti pe dir avek son vwazen mon garson in ale. In kit pei in ale, mon pa konnen aköz. E son vwazen i vire i dir ek li, be in anv i ale. Li ki'n anv i ale. Apre zot blanm Gouvernman.

Letan en dimoun i dir ek ou son frer in ganny eksploze dan en transpor, son vwazen i vire i dir ek li, be wi, i ti abitye bwar lalkol, in sou, daler mwan loto in eksploze. San konnen Mr Speaker, dan nou prop pti pei ti annan bann dimoun ki ti pe travay bann travay sal. Pe

viktimiz nou frer, pe entimid nou ser, pe fer per nou zanfan e pe met nou bann vyeyar anba lafreyer. Parske sa letan personn pa ti kapab koze.

Se pour sa rezon mon dir sa legzersis ti enportan pou mwan. E letan nou bann dimoun alaz, nou bann trwazyenm-az, tou le Dimans zot desann lanmes san mank en sou lafet laparwas, zot al fer zenifleksyon koman en kretyen, pe siport sa parti politik ki ti pe zis fer disparet nou frer, dan en pti pei avek en pti popilasyon, sa letan 60 a 70 mil dimoun.

E letan Mr Speaker, nou koz tousala, nou'n antann tousala, pou serten sa Prozedlwa ti devret retourn dan lepok lesklavaz. Me sa Prozedlwa ti pas isi dan Lasanble Nasyonal Mr Speaker. Sa letan ti annan serten zot ki pa ti dan Lasanble, me selman zot ti dan lakwizin pe ekrir *speech* pou donn en lot pou dir. Me ti enportan pour ki letan ou ti pe ekrir *speech*, dir poudir olye koman 77, dir annou anmenn li depi 1835 letan lesklavaz ti ganny aboli pou nou koz lo la.

Me pa vin dan Lasanble Nasyonal, dan lenpresyon poudir 1977 pa ase, kan nou ti konnen poudir zistwar i rakonte poudir ler minwi pou sonn wi,

kales pou nepli kales, i pou retourn sa zironmon ki i ti devret ete.

Mr Speaker, alors letan nou koz lo bann Lalwa sitan enportan, nou pa kapab sey anmenn lesklavaz. E la mon anvii dir Mr Speaker, letan Onorab Loze i koz lo lesklavaz an relasyon ek sa Lalwa, e i vini i dir ek nou poudir i annan dimoun ti ganny anmare, i annan ti anmar lezot. Li i bezwen *substantiate* son *statement*. I bezwen dir nou dir nou si li ki ti anmar en dimoun avek pye papay, oubyen si li ki ti ganny anmare avek en pye koko.

I pa kapab zis vin dan nou Lasanble, *speculate*. E parey son leader tou kou i *advice* nou, nou bezwen *substantiate* nou ban largiman. Lesklavaz, sa ki ti pe arive dan nou pei sa letan, ti en form lesklavaz dan en pei modern. Sa ti lesklavaz.

Letan nou ganny en lot Manm i vini i dir avek nou agasan. Lalwa i agasan. Lalwa i vini, Lalwa i ganny amande, Lalwa i ale. Mr Speaker, me Onorab Wallace Cosgrow, in deza dan Gouvernman li. Zanmen son Gouvernman pa ti agasan pou li letan zot ti anmenn bann Lalwa par egzant POA? Konstitisyonnèl pa

konstitisyonnèl? Anmennen pa pou anmennen?

Letan zot ti annan zot bann proze parey Stad Lanmizik ki ti komans lo R2.50 apre in fini lo 50milyon. Me pa ti agasan sa letan Mr Speaker, pou li avek son Gouvernman?

Letan zot ti pe depans nou larzan kot *SBFA* pe pran *loan* apartir *loan*. Lot i pran i *write-off*, i retournen i pran ankor, i ale i pran en lo e i ankouraze son dalon pou fer *backyard farming* dan bann landrwa kot i annan flat. Pa ti agasan sa letan Mr speaker, pou Onorab Wallace Cosgrow ki'n koz lo sa Prozedlwa sitan enportan koman agasan? E ozordi i annan plizyer nou pe reste lo later nou kanmarad, akoz sa parti politik in permet nou antre pou fer sa. Eski sa pa agasan Mr Speaker, lo en proze sitan enportan?

Letan Onorab Rocky Uranie Mr Speaker, i vini i dir nou poudir sa ti en *telenovela*. Eski letan en frer Seselwa i akont nou mannyer larme i tenn en sigaret lo son ledò, sa i en *telenovela*? Letan enn nou frer Seselwa in dormi ater, i montre nou mannyer solda i pran en *boots* i fou dan son latet parey Onorab Audrey ti pe dir, pou ou sa i en *telenovela*.

Letan enn nou frer i ganny en ver delo Port Glaud, kot in ganny sans arive, e letan i pe bwar son ver delo, disan pe koul dan son ver delo, pou zot sa i en *telenovela* mon bann frer ek ser? Me sa i en sityasyon serye ki'n arive dan nou pei. Nou pa kapab rikannen lo la koman en telenovela Mr Speaker. I en dokiman serye ki nou pe koz lo la.

Letan Audrey Vidot, Mr Speaker. i vini i dir avek nou i koz zis lo sa enn ki'n ganny - Onorab Vidot, pardon. Letan Onorab Vidot - (Mersi Onorab Loze pou *remind* mwan) - (Mon pa pou anmar li mwan) Onorab Vidot, Mr Speaker, i koz lo sa enn ki ti ganny mete lo en avyon pou ale, e toultan son largiman i lo sa enn ki'n ganny mete lo en avyon li.

Be dan nou pei ti napa bann ki ti ganny mete lo en avyon. E mon kontan sa ki Onorab Vidot in dir. Parski sa enn ki li i pe fer referans avek, ti ganny mete lo en avyon in ariv byen dan son pei li. In vwar son zanfan, i vwar son mari.

Me bann ki ti ganny forse pou kit son pei pou al egzile dan en lot pei, san konnen kot i pou ganny en lasyet manze, eski sa i konparab? Letan Marek ti ganny mete dan en bwat kartron, anmare latte anba pou

ganny anvoye dan son pei, sa i konparab avek sa enn ki ou pe dir ?

Letan nou bann frer Seselwa dan nou pei, i ganny forse pou li al egzile dan en lot pei, eski sa i konparab avek sa enn ki Onorab Audrey pe dir Mr Speaker? En? Be nou bezwen serye dan sa ki nou pe dir.

Letan Onorab Aglae i vini dan nou Lasanble Nasyonal i zistifye sa ki ti arive 77, eski sa i normal Mr Speaker? Apre i vire i dir ek ou i pa ti ankor ne, i lav son lanmen ladan li. I dir ek ou i pa ti ankor ne, i pa ti la li. Be letan ou pa ti la, ou pa konnen ki'n pase, ou pa kapab zistifye bann krim ki ou Gouvernman in pran par ladan Mr Speaker !

E letan ti pe ganny dir zot devret ganny pardonnen, demann pardon parey Onorab Naddy in fer, parey Mr Faure ti fer, i annan zot ki vire Mr Speaker, ou konnen ki zot dir, zot pa pe demann pardon pou naryen *off-mic*. Me selman zot kontinyen asosye avek sa parti politik ki'n fer tou sa atosite dan nou pei. Zot in batize zot in sanz zot non, zot in sanz zot non, me zot ankor menm parey. Nou konnen se zot ki la. Me malerezman i annan plizyer zot ki pe siport sa parti ki zot pa ti ankor ne.

I annan ki sa letan ler sa bann atosite ti pe pase, zot ti siport en lot parti politik, zot ti siport Demokratik sa letan. E ozordi zot in siport sa menm parti.

Mr Speaker, mon'n komans koumsa parske mon krwar i pou enportan pou nou bann dimoun ki pe ekoute konpran. Letan nou ganny bann lektir tou le semenn dan sa Lasanble

"Nou pa pe koz pou nou Seselwa,"

"Nou pa kontan nou Seselwa,"

"Zis zot ki lavwa Seselwa,"

"Seselwa i anvoy zot tou mail - tou mesaz, "

"Tou dimoun i anvoy zot zis lenformasyon,"

E ou vire ou tann sa bann menm Manm Onorab ki'n koze, ozordi koz lo

"Agasan,"

"Telenovela",

"Lesklavaz,"

Be i anvoy en lot mesaz. Pa sa mesaz ki zot dir avek nou. La ozordi ler Seselwa i bezwen zot pou ganny en sipor, bezwen zot pou *acknowledge* poudir sa ki ti arive dan lepase ti mal, i annan en bann i dir ek mwan pa tro, tro sir si mon pou kapab vote. Mon pa ankor tro, tro konnen. Mon pa tro, tro asire.

Ler pou zot met zot parol kot zot labous ti été, zot pa asire?

Ozordi i en moman letan pou nou montre Seselwa poudir wi, nou pou siport zot dan sa demars e wi sa ki ti arive sa bann letan ti mal. Setaki i lav son lanmen parey Pilate Mr Speaker.

Me sa ki pli pir, letan nou kontinyen lager pou lezot dimoun, nou pe rod aköz nou pe pey en Seselwa aletranze R200 ekek mil, i annan en lot leokri ki pou pase Mr Speaker la, ki nou'n komans tandé. 50milyon, 25 milyon, 60milyon, 5milyon. Pa pou pey etranze sa, pa etranze ki pe rode sa. Se bann Seselwa ki reste, ki pe viv aletranze.

Akoz sa sistenm ki ti fer zot per, ki ti met zot o en avyon ti dir zot al dan en lot pei, byento zot pou komans tap nou laport.

Be lekel ki pou peye sa bann konpansasyon? I pou enportan osi sa, sa osi pou vin en leokri. E mon asire nou pou annan bann *PNQ* ki pou monte, pou nou kapab demann Gouvernman kote pou ganny sa larzan pou pey sa bann atosite ki bann *SPPF* in fer. ? Parti *US/Lepep/SPUP*. E i annan Manm Mr Speaker, ki kontinyen ganny kosmar *SNP* dan nou Lasanble.

Onorab Loze i kontinyen ganny kosmar lo *SNP*. I kontinyen mansyonn *SNP*, sanmenm sa parti politik ki'n bros *SPPF* sa, parti *SNP*! Sa parti ki'n bros *SPPF*.

(APPLAUSE)

HON SANDY ARISSOL

Parski zot ti krwar zot *untouchable*. Zot pa pou kapab dir zot naryen, pa pou kapab fer zot naryen. E mwan sa ki mon pli *happy* ler mon ti *SNP*, Lydia Jumeau ti obor mwan pe dir "pa pou zanmen les tonbe Mr Speaker!" Sa wi en parti ki'n donn ou kosmar Onorab. E mon konpran sa kosmar. Ek letan, ek letan i ava terminen.

Letan mon tann bann *SPPF* i kontinyen koz lo larzan, pa bliye letan nou pe koz lo larzan nou pe depans larzan avek bann Seselwa. Zot in klasifye Seselwa koman 2 kalite Seselwa zot. Enn ki vin aletranze avek enn ki reste isi. Pa bliye *SPPF* Mr Speaker, zot in depans larzan, nou larzan avek bann Seselwa ki zot klasifye reste aletranze zot. Ler zot ti pey avyon pou anmenn Seselwa vote, zot bliye?

Avyon desann plen sorti Sidafrik, Langleter, Kanada. Pou pey zot bann dalon pou vin vote. Be ti larzan lepep Seselwa

sa! Ti larzan Lepep Seselwa. E tousala ozordi in amenn nou kot nou ete ozordi.

Sa prosis i bezwen kontinyen. Mwan mon pou siporte pou sa prosis i kontinyen, parski sa report ki pou ganny *compile*, met ansanm i pou enportan pou Lepep Seselwa;- i pou enportan pou mwan koman en zenn ki tipe viv dan bann lannen 77 an montan, pou mwan konnen zisteman ki ti vremen arive. Sa ki parey mon'n dir, i annan plizyer vwazen, i annan plizyer dimoun obor nou ki pa ti konnen poudir nou pti pei ti bon pou en pti group dimoun, me lot kote ti annan plizyer nou frer avek nou ser ki ti pe pas atraver plizyer atosite, plizyer krim Mr Speaker.

E alors pou sa, mon asire ki e mon ti a kontan felisit bann *Commissioners* laba, ki'n fer sa travay, bann dimoun ki'n vin devan pou donn zot letan, pou zot kapab anmas tou sa bann lenformasyon, pou sa bann dimoun anmas tou sa bann lenformasyon, *compile* li, met li annord pour ki finalman i ava annan sa rezilta ki nou, nou pe espere avek sa rapor. E dimoun pe swiv, e dimoun pe espere an rezilta avek sa travay ki sa bann *Commissionners* zot pe fer.

Mr Speaker, mwan mon ava aret la,. Mon ava donn sans bann lezot dimoun pou koze e apre nou ava ekout Vis-Prezidan an relasyon avek sa bann lentervansyon ki nou'n fer, pou li donn nou serten klarifikasyon pou dir nou serten dout kekfwa ki nou ava annan lo la.

Me selman mwan napa okenn dout an relasyon avek sa travay ki mon Gouvernman pe fer. Mon ti a kontan profite pou felisit mon Gouvernman, e la mon aprann poudir mon Prezidan in ganny sans al Kenya, zisteman pou linogirasyon en nouvo Prezidan Kenya. Sa i montre poudir lanmitye i ant pei ek pei. Me pa bann endividi.

Politik parey mon toultan dir, dimoun i ale, dimoun i vini e politik li i reste. Parey dan pei, Prezidan i ale, Prezidan i vini. Me pei i bezwen reste, pei i kontinyen fer sa travay e pei i bezwen ganny soutenir lo bann keksoz ki byen, parey mon Gouvernman i anvi nou kontinyen ale.

Me selman i enportan Mr Speaker, pou mwan fini lo sa pwen. Fodre pa nou bliye mon bann zanmi. Parti *US* i anvi retourn dan Gouvernman. Parti *US* in dir zot pou retourn e zot anvi retourn dan

Gouvernman. Letan zot pe mazin retourn dan Gouvernman, zot, zot pe vwale li nou desizyon ki *Truth* pe fer.

E fodre pa zot bliye poudir zot *leader* ti *remind* nou dan enn son bann *speech* poudir si zanmen i annan okenn dimoun ki sey met en retar dan zot travay, i pou ganny vwar dan en rigol anba en pon! Sa osi i enportan pou nou mazin byen sa.

(APPLAUSE)

HON SANDY ARISSOL

Pou Seselwa reflexir byen lo la. Eski sa kalite *statement* ganny trouve dan en rigol anba en pon, eski pa i retourn lo sa travay ki *Truth* pe fer, kot nou bann frer in ganny vwar anba en pon. In ganny vwar forse dan en lot, ganny zete Salazie laba anler Sans Soucis. Eski pa sa ki zot *leader* pe dir nou? Eski sa menm parti politik ki anvi prezan re ganny pouvwar? Ki zot pou fer? Pou fer revanz? Pou zot re zet dimoun ankor? Pou zot met nou anba en pon, anba en rigol? I enportan pou bann dimoun ki pe ekoute reflexir sa bann parol ki'n ganny dir. I enportan Mr Speaker.

Pou 43an, keksoz in ariv koumsa. Mon pa ti a kontan

zanmen mon ti pei i retourn ankor koumsa. Alors pou sa mon pou donn sipor sa proze Lalwa, parske mon anvi sa travay i kontinyen parey mon'n dir, pour ki tou bann *facts* i ganny met annord, pou nou kapab ganny en zoli rapor an relasyon ek sa travay ki bann *Commissioners* dan *Truth* in fer.

Avek sa detrwa parol Mr Speaker, mon ti a kontan remerci ou.

(APPLAUSE)

MR SPEAKER

Mersi Onorab.

(Off-Mic)

MR SPEAKER

Point of order. Wi, ou non in ganny mansyonnen, me an relasyon avek keksoz ki ou'n dir dan Lasanble.

(Off-Mic)

MR SPEAKER

Onorab, eskiz mwan. Mon pa kontan ton ki ou pe koz ek mwan. E pour sa rezon mon pa pe donn ou en *point of order*. Si pa kontan ...

(APPLAUSE)

MR SPEAKER

Si ou pa kontan ou annan zis, laport i obor ou la, ou annan zis pou sorti. Mersi.

Onorab Pillay mon pou donn ou laparol *Leader* Lopoziyon prezan pou adres *Bill*. Mersi.

HON SEBASTIEN PILLAY

Mersi bokou Mr Speaker. Pou seselwa ki pe swiv sa deba apre sa lentervansyon ki Onorab Arissol in fer, kot in koz lo ki manner bann *SPPF*, bann *SPUP*, nou'n - Bann dimoun ki'n siport sa parti in swadizan touy dimoun, fer martir tou dimoun e bann dimoun ki ti dan Gouvernman sa letan, se sa Gouvernman ki'n fer tou sa bann atosite. E ou reaksyon avek Onorab Loze ler in demann en *point of order*, mon krwar i kler ki poudir ki bokou Seselwa mon pou al eksplik zot ki manner sa kales ki ti en kales an 2020 in vin en zironmon.

Mon pou eksplik zot sa akoz mon pou servi plizyer legzanp pou ilistre ki manner i annan en serten lipokrizi dan lafason, ki nou koz lo lekel ki responsab pou kwa. Annou komans lo premye pwen.

Non, i en diktater, les li, i kontan entervenir ler dimoun pe koze li. In devlop en latitid diktater li.

Ou konnen sa ki'n arive avek nou pei se ki ozordi i annan 3 Lakour ozordi dan ki dimoun i ganny zize. Premyerman i annan Lakour lopinyon piblik,

Dezyenmman i annan Lakour laba anndan kot *Palais de Justice* e trwazyenmman i annan Lakour bann *MNA LDS*. Akoz mon dir i annan Lakour bann *MNA LDS*, akoz ozordi bann *MNA LDS* pou dir ou lekel ki koupab, lekel ki pa koupab. Lekel ki'n fer, lekel ki pa'n fer.

Be tyonbo en kou, atraver ou Mr Speaker, be zot Vis-Prezidan pa ti form par bann Gouvernen *SPPF* li. Son responsabilite akoz li i ti pe pran lord. I ti en *public servant*. *MNA* Onorab William, pa ti en *MNA* dan Gouvernman *SPUP/SPPF* li? Li osi i ti pe pran lord? *MNA* Clifford Andre, ti pe pran lord, ti pe sa?

Onorab Naddy Zialor ki ti en aktivis, ki ti al pas bokou letan ek Mr Rene dan *weekend*, li osi i ti pe pran lord?

(laughter)

HON SEBASTIEN PILLAY

Annou aret fer sa bann kalite kalonmni dan Lasanble. Akoz mwan mon pa vin kraz personn, akoz tou sa bann dimoun ki mon'n nonmen zot in deservi

mon parti, e mon respe servis ki zot in donneren. E zanmen, zanmen mon pou vin kritik zot oubyen fer sa kalite kalonmni ki'n ganny fer, parey ki'n ganny fer lo bann *MNA* lo mon kote latab.

E bon pa bliye, Onorab Doyace Porice ti dan Milisya.

(laughter)

HON SEBASTIEN PILLAY

Ok, annou ganny sa kler en. Annou arete sa zafer akoz si nou kontinyen avek sa, se s aki pa pou zanmen anmenn linite parmi nou. Akoz si mon'n ekout zot depi yer, e mon'n ekout bann lentervansyon ki mon'n tandé, zot pe pres linite - zot pe pres linite me selman *at the same time* zot pe pres laenn ek vanzans.

Annou pa ankoler bann Onorab, mon pa'n nonm zot non dan en move fason mon. Mon'n zis ilistre le pwen ki sa laliny ki nou oule desinen dan disab ozordi, ki nou dir sa enn ti *SPPF*, sa enn ti la, ou pa kapab desinen. Be *CEO STC* li, be ki i ti ete dan letan ki *SPPF* ti o pouwar li?

(Interruption)

HON SEBASTIEN PILLAY

Minis Dezinyen, Minis Ferrari, kot i ti ete sa letan li? Mon pwen mon lepep Seselwa, se pou montre ki mannyer i enposib pou ou Sesel, desin en laliny dan disab e dir sa enn i responsab, sa enn pa responsab. I enposib.

Me, me -e se la kot zot in mal enterpret tou sa ki'n ganny dir lo sa kote latab. Me - e mon dakor ek sa ki Onorab Adelaide ti dir yer, kot i annan dimoun ki'n *wilfully* ale, fer son keksoz ki responsab, ki apre pou met lo ledon sa parti oubyen lo ledon en endividi. Be la, la *we draw the line*.

Be mon dakor ek sa ki ou ti dir yer. Ozordi mon pa kapab vire, blanm Onorab Arissol pou en keksoz i en aktivis anler St Louis i fer. Mon pa kapab vire blanm Speaker, Mancienne ki *Leader LDS*, pou ki sa ki en aktivis *LDS* i fer en lot landrwa. Pa kapab.

Sa dimoun ki pran desizyon pou en aksyon, i pran son desizyon pou fer son aksyon. Mon pa'n zanmen pran li pou mwan nwir en dimoun. Mon pa'n zanmen tann en *meeting* letan mon pe zwenn mon bann koleg la, kot koman sa parti ki *inherit* sa ki *SPPF* in fer. Mon pa'n zanmen tann okenn dimoun vin dir mwan fer

en tel dimoun ditor, fer tel dimoun ditor. Pa fer.

So, fodre aret fer keksoz an deor konteks. E prezan mon vwar Mr Speaker, atraver ou. Mon pe grens Onorab Naidu. Mon pou bezwen *remind* Onorab Naidu sa pti dokiman ki i ti met son lanmen lo la, i apel Konstitisyon. E ler ou Onorab Naidu ou vire, ou pran lakoler avek Lasosyasyon viktim *TRNUC*. Mon oule dir avek ou koumsa, sa Lasosyasyon viktim i annan tou drwa form en lasosyasyon si zot anvi. Akoz Konstitisyon i garanti zot drwa lasosyasyon.

Zot annan tou drwa al an deor *TRNUC* si zot anvi. Akoz i zot drwa e mwan mon napa problemm avek sa. Akoz sa bwat ki nou ti ladan nou, nou'n sorti ladan. Me zot ki pe antre dan sa bwat prezan, *LDS*. E apre ki bal in fini dan zot fizi, sel bal ki zot annan se *remind* lo tou sa ki'n pase dan 43an.

Me atraver ou Mr Speaker, mon ti a kontan demann Onorab Woodcock. Onorab Woodcock, kote ou lavwa ti ete ler nou ti pe koz lo trezyenmman dan Lasanble ou? Kote ou lavwa ti ete ler nou ti pe koz lo *redundancy* *SPTC* an Lasanble ou? Kote ou lavwa ti ete ler nou ti pe koz lo travayer *IOT* ki pa ti pe ganny bis pou al

se zot? Kote ou lavwa ti ete ler nou ti pe koz *long service allowance*? Kote ou lavwa ti ete ler nou ti koz lo mankman latizann? Kote ou lavwa ti ete yer ler nou ti koz lo *logo* ek sa kantite artis Seselwa ki ti kapab partisip dan sa *logo*? *Ok.*

Kote ou lava ti ete ler mon ti koz lo *Travisory*. Pou demande ki en Seselwa i aret demann permisyon pou antre dan son pei, Seselwa i aret peye? *Hmm?* Kote ou lavwa ti ete ler nou'n tande poudir atraver sa *saga Box to Box*, mesaz pe ganny anvoye pe dir ki sa bann dimoun ti ganny sa akoz relasyon politik.

Me si en parti politik i ankor pe fer sa ozordi, oli linite? Soudennman ou'n re ganny ou lavwa pou ou koz lo *TRNUC*? Be mwan mon'n koz ek en bon sa bann dimoun lo Praslin ki ou'n mansyonn sa lensidan. Pase al vwar bann la ou.

MR SPEAKER

Onorab Pillay, mon bezwen dir, mon pa krwar bann pwen ki ou'n fer an relasyon avek Onorab Woodcock. En Manm i lib pou li koz lo sa ki i anvi dan sa Lasanble e pou li pa koze si i santi i napa naryen pou dir.

Mon konpran si ou fer en referans avek li lo en *statement* ki in fer lo sa Lalwa ki devan

nou, me selman mon pa krwar poudir i zistifye pou ou kestyonn son rikord lo bann lezot size ki napa naryen pou fer ek sa Lalwa. So, mon a zis koriz ou la e mon a dir ou silvouple annou *get back* laliny ki ou pe pran.

HON SEBASTIEN PILLAY

Avek tou respe ki mon annan pou ou, akoz ki ou pa ti kestyonn Onorab Arissol ler i ti met Onorab ...

MR SPEAKER

Tou sa ki....

HON SEBASTIEN PILLAY

... akoz ou pa ti kestyonn Onorab ... Arissol? Ki mannyer zis mwan ki oule kestyonn mwan?

MR SPEAKER

Eskiz mwan. Eskiz mwan, mon pa pou antre dan en largiman ladan. Me tou sa ki Onorab Arissol in dir, i ti an relasyon avek *statement* ki'n ganny fer dan sa Lasanble lo sa *Bill*. Ou osi si ou swiv menm legzanp mon pou satisfè. Mersi.

HON SEBASTIEN PILLAY

Wi be mwan mon annan en senp keksoz pou dir ou. Mon pou kontinyen koze e ou pa pou anpes mwan koze ou.

Dezyenmman sa ki kler. Sa ki kler i se ki, e la mon oule fer lepep Seselwa realiz, sa ki pe ekout nou realize, poudir soudennman bann *MNA LDS* in re ganny zot lavwa pou koze dan Lasanble, me selman *when it comes to challenging* zot prop Gouvernman, *MNA LDS* napa lavwa. Zot pa kapab !

En *PNQ* dan Lasanble, Minis i ganny sans taye pou li pa reponn, ou tann ou en legzanp kot travayer i dir ou in ariv 30mil liv, Minis i dir ou i ariv 279 e en lot dan menm kestyon i dir ou R450mil. I lo *Bill*, i lo *Bill* akoz si *TRNUC* i dir nou koumsa nou pa fer fot ki lepase in fer, *then* zot, zot pe repet tou sa ki'n mal dan lepase.

E sa in ganny eksplike par zot Prezidan ki'n dir poudir ou pa kapab pli katolik ki Lepap. E in osi dir poudir lekspektasyon ek sa ki ou gannyen i de diferan keksoz.

E ozordi zot ava annan lodas pou zot vin pas zizman lo sa group *United Seychelles* ki la. *Sorry!*

Atraver ou Mr Speaker, nou tann koz bokou lo sa size later, zis latak lo size later. Be *look*, mwan ler - yer swar mon'n ekoute. I annan dimoun ki'n *call* mwan, ki pa'n kontan sa ki mon Manm in dir, mon

apresye zot lopinyon. E mon annan dimoun ki'n *call* mwan ki'n dir, be i annan keksoz ki ou Manm pa'n koz la. *Ok.*

I annan dimoun, e sa i normal. Akoz tou dimoun i annan drwa a zot lopinyon. Me akoz Onorab Larue yer atraver ou Mr Speaker, par egzanp ki Onorab Larue yer, i pou pran sa ki Onorab Rocky Uranie in dir an deor konteks e li i oule fors son lafason vwar keksoz lo Onorab Uranie, san aksepte poudir be Onorab Uranie sa i ou lopinyon, mon pa dakor avek akoz mwan mon krwar i koumsa.

E se sa ki pe arive Sesel. E se sa ki'n arive avek *TRNUC*. E se sa rezon akoz nou pa pe kapab ariv lo sa *middle ground* ki nou ti komans lo la an relasyon ek *TRNUC*.

Sa *middle ground* ki ti komanse ler zot koz Prezidan Faure. Silvouple, pa sey konpar Prezidan Faure avek Prezidan Ramkalawan, la ou pe konpar Obama avek - I de diferan konparezon sa. Tro lwen.

(interruption)

HON SEBASTIEN PILLAY

Lentansyon. Lentansyon Lasanble ler i ti pas sa Lawa, sete pou annan en kolektiv lopinyon lo ki mannyer nou pou

vwar sa bann size ki'n arive. E prezan nou'n ganny demande akoz Onorab Loze pa ti anmenn pwen lo lesklavaz. Me sa pwen ti ganny diskite. I ti ganny mete. I pa ti ganny aksepte akoz mazorite Lopozisyon sa letan, ki ti zot menm LDS, pa ti oule sa pwen.

Zot *focus* dan zot Mosyon sete pou regard 77 akoz ti annan en konotasyon politik avek. E mwan mon pe dir ek zot, fot ki zot, zot in fer se ki serten antre zot in profit lo TRNUC pou fer zot *political campaigning* e se sa ki'n derout TRNUC. Mon pa pe blanm bann Komisyoner, zot in fer zot louvraz. Mwan napa naryen pou dir kont TRNUC mwan. Me mazinasyon politik otour li ki'n fer sa.

E prezan kestyon fondamantal ki bann viktim i devret demann zot lekor, se akoz ki Gouvernman apre tou sa ki in tandé, prezan ki i deside pou li vin ek en lamannman ki *extend time frame* pou TRNUC *submit* son rapor?

Pa i ti konnen poudir tou sa lenformasyon ki TRNUC i annan. Pa TRNUC ti pe dir li i annan tou sa lenformasyon. Pa nou'n vwar i annan tou sa lenformasyon. Akoz ki la ki vini? Non, Gouvernman i

bezwen *go back to the drawing board* e *come up* avek en *commitment* kler, lo ki i annan lentansyon fer vizavi TRNUC, dan plas zis *delay the inevitable* ziska ler sa rapor i vini.

Prezan en lot keksoz enportan ankor ki nou bezwen gete. Nou pe koz lo rapor TRNUC. Ler nou ti komanse ti annan en diskisyon ant tou dimoun, *including involving all parties*. Ki diskisyon ki'n annan avek nou lo sa akote latab vizavi lamannman ki pe vini.

Ki enteraksyon ki'n annan apart dan *Bills Committee* lo sa Lalwa? Ki'n annan? Napa okenn enteraksyon. Parey ti annan bon lentansyon lo komansman, sa bon lentansyon in ganny *highjack* par en lentansyon politik, par en parti politik ki rapidman pe vwar ki *lead* en pei i bokou pli difisil ki i ti krwar, e sa lagrenn bat latet ki i ti vann dimoun an 2020 pe fini.

Mon fer sa akoz zot, zot in atak nou *track record* koman en Gouvernman. E nou *track record* koman en Gouvernman wi nou pou pran li. Nou bezwen pran li. Nou pran le byen, nou a pran le mal. Nou bezwen aksepte. Si i annan en keksoz mal ki'n arive, nou ava aksepte.

Be nou bezwen osi aksepté sa ki byen ki'n arive. Tou sa *building* ki'n ganny konstri dan sa pei, zot ki'n fer? Tou sa lekòl dan sa pei, zot ki'n fer? Be tou dimoun in admet poudir lo lendeks devlopman Sesel ti pli o. Me Sesel in regrese dan Lendeks Devlopman resaman en? Nou'n desann dan lendeks devlopman.

E nou nou'n desann dan Lendeks Devlopman anba zot *watch*. La realite i se ki ou bezwen les listwar fer ou pa repet listwar. E mwan, mon prensip konmela i se ki nenport dimoun ki annan en lopinyon i eksprim son lopinyon. *No matter what*. I kontan mwan, i pa kontan mwan. Me si ou eksprim ou lopinyon, eksprim ou lopinyon.

Ah, pa sey vin bat person, pa sey vin trangle person, pa sey vin fer sa ek person. E parey atraver ou Mr Speaker, mon'n dir avek Onorab Naidu, Konstitisyon ki dir. Akoz Konstitisyon i dir ou, ou pa kapab pran 3 zenn St Louis, aret zot e zot paran pe rode kote zot ete. Konstitisyon i dir, ou pa kapab pran Madanm Veronique Adeline, aret li e son fanmir pe rode dan ki kaso in ganny mete. Mwan ki bezwen *drive* 9er diswar pou

al rod li dan kaso anler Anse Boileau.

Konstitisyon i dir ou, ou pa kapab pran en *seaboot* e pran zofisye Larme ki dan cagoul, in kouver son figir, ou pa kapab idantifye li pou met *boots* lo en dimoun.

Pe enport, si ou pe fer en aksyon ki byen ou pa kapab fer en aksyon ki mal. E ou pe koz mwan *TRNUC*, ou pe koz mwan. Be tousala pe ganny repete la. Konstitisyon i dir mwan ou pa kapab koup kontra en boug ki netway lans akòz i sipòrt *US*, i ti dan *rally US*. E rod fason pou fer li netway pli gran bout lans pou mwens larzan. Sa pe arive sa.

Konstitisyon i dir ki dan ou distrik, pa akòz en *staff* ki dan biro i annan relasyon avek en dimoun ki en kandida oubyen en *MNA US*, oubyen *whatever*, pou ou fer si ou nwir sa dimoun pou li kit son louvraz. Konstitisyon i demann ki ler en dimoun i *apply* en louvraz ozordi ou pa demande ki parti i sipòrt e sa pe arive dan nou pei ozordi.

Se pour sa rezon ki mon'n koz dan sa fason, akòz mon krwar poudir bann *MNA LDS*, soudennman zot in re ganny zot lavwa. Be osi zot lavwa ler zot ep resewar sa ta text ki

konsern mankman latizann dan Lopital?

Mon konnen bokou zot i annan dimoun ki'n dir mwan in anvoy zot mesaz. Mon pa pou nonm non. Me i annan dimoun ki'n dir mwan in anvoy zot mesaz. Mon annan la lo mon telefonn si oule vwar, mon ava donn ou laprev. Mon ava anvoy pou ou, akoz i annan dimoun Mont Buxton ladan.

MR SPEAKER

Onorab Henrie, aret entervenir silvouple.

MR SPEAKER

Ou vwar Mr Speaker, en dimoun in vin Deputy Speaker, ou Sekreter Zeneral ou parti politik, me ou pa oule personn i eksprim son lekor.

MR SPEAKER

Onorab Pillay. Posede, kontinyen silvouple.

MR SPEAKER

Non, nou bezwen fer sa bann pwen, akoz dimoun i bezwen tande. Prezan ler nou pe koz sa peryod letan. Annou vin lo sa peryod *TRNUC*. Eski i annan en Seselwa ki'n zanmen demann son lekor ki mannyer msye entel li in ganny sa later depi lo lans depi ziska dan bwa? Ki mannyer imsye entel ti ganny

sa li? Kote ki i ti pase msye entel ki i ti ganny sa.

Ki mannyer apre 40an ki madanm Jean i reste lo en later pou tou sa letan, en zeritye ki reste Kanada i dir li, b e la ou bezwen sorti lo mon later, mon pe vann mon later.

Kot ou ti gannyen ou. Kot ti pase ou. E nou pa oule aksepte ki sa lenzistis ki ti annan avan 77, sa lenzistis avan 77 ti egziste e nou oule ki tou zenerasyon konmela i bliye. Ou konnen akoz? I fasil pou fer bliye akoz sa bann dimoun ki'n viv sa lenzistis, bokou zot ozordi, *sadly* pe kit nou. Ki zot nanm i repoz anpe.

Pa pran mwan koman *Je crois en Dieu* konmsi koze, al dan lekol i annan en legzibisyon lo *slavery in Seychelles*. E i montre ou lakaz en fanmir nwar. I mete lo la, *maison d'une fanmir noire aux Seychelles*. An 1976 pa 75. I montre ou sa. E bokou nou ki'n vin *graduate*, ki'n devlope, ki ozordi nou annan nou baro, ki nou annan tou nou keksoz la, rod nou gran paran kot ti reste.

E mon dakor ki zot pou dir mwan poudir be pei in evolye. Wi, be pei in evolye, be eski nou pe evolye la dan Lasanble pou nou anmenn plis linite? Apre sa ki mon'n tande yer, non.

Akoz nou oule koz lo listwar zis dan en fason. Ki en kote en fer tou keksoz ki mal dan sa pei. Ki en kote in fer tou dimoun martir. Me selman pandan tou sa martir ki nou'n fer i annan bann gro imsyè ki'n vin bann gro, gro msyè dan sa pei.

E dezyenm kestyon ki nou bezwen demande. E sa mon pou mwan i fasin mwan ler mon'n ekout bann dimoun ki'n eksprim zot sa. E mon napa rezon pou pa krwar sa bann dimoun. Mon demann mon lekor, mon dir be akoz ki zot, zot ti ganny target sa bann. Konmsi eski ti annan en endividi ki dir be akoz mon annan en problem ek John Hoareau, atraver ou Mr Speaker, Onorab Hoareau. Mon pou target Onorab Hoareau.

Eski akoz mon annan en problemm avek Onorab Woodcock, mon target Onorab Woodcock? Ou konnen, espere Onorab Woodcock, mon pou eksplik ou akoz, dan ki konteks mon pe dir sa. Mon pe dir ou, mon pa pe dir ki sa bann dimoun in eksprimen pa vre mwan, akoz nou'n vwar pou dir i vre, be mon konsernen akoz be i annan dimoun ki pa'n siport sa sistenm, ki'n ouvertman pa siport sa sistenm, ki'n

kontinyen vin milyonner. In kontinyen ganny later Providence, in kontinyen ganny tou keksoz. I annan dimoun ki'n ganny gro, gro plas dan Gouvernman in dir ou in ganny viktimize.

Be si ti pou ganny viktimize, mon osi mon anvi ganny viktimize koumsa en kou. Konmsi, mon anvi etabli sa konteks. E mwan napa keksoz ki'n pli sok mwan, ler mon'n tann par egzant dimoun ki pe eksplike ki mannyer zot ti al fer tel travay. Ki kalite travay ou ti al fer ou, lekel ki'n donn ou sa travay pou al fer.

Mon'n asiz dan plizyer *meeting* SPPF, US, zanmen mon'n deza tann okenn dimoun al fer tel travay. Akoz dan mon fanmir i anna dimoun ki siport US e i annan dimoun ki siport LDS. Eski mon pou desin en laliny pou dir mon pou fer martir mon fanmir ki siport LDS e pa koz ek mon fanmir ki siport US.

Parey zot tou la, mon'n dir zot laliny Sesel i tro difisil. So, mon pa pe tir responsabilite lo personn mwan. Mon pe zis dir ki nou bezwen get larealite an fas.

En lot pwen ki'n sorti atraver Onorab Larue Mr Speaker, atraver ou. Se ki konsern bann ansyen Prezidan.

Look, b e demann ou Prezidan, akoz li ki frekant sa bann dimoun. Mon pa pou konnen mwan. Mon pa pou konnen, *ok* akoz mwan sa ki mon konnen se ki ler ti fer en lanons en fwa dan enn zot *rally*, zot tou zot ti bat lanmen.

So, arete vin pran en keksoz ki devan zot laport pou vin balans devan nou laport. Larealite i lanmenm devan nou. Si nou oule bouze.

Zot dir nou pa koz lo sa bann letan, nou oule bouze. Be *then* osi, be *ok*, be annou bouze. Akoz si ou pe koz mwan ozordi e mwan, e sa i en keksoz zot kapab al tyeke. I annan zot aktivis. *Ok*, pa zot aktivis. I annan Seselwa, ki'n vin anmenn problemm devan Minis *regarding* serten *case*, serten Minis e sa Minis in dir li *move on*. *Move on*.

E tou sa bann *MNA* lo lot kote latab i konn tre byen ozordi ki zot pa satisfè. Mon get lo zot figir mon vwar. E problemm, zot per pou koze. Zot per pou koze e akoz zot per pou koze, zot pa kapab koz lo non lepep Seselwa. Se sa la realite.

E i annan en lot keksoz ki enteresan ler mon'n ekout sa *mea culpa yesterday* ki Onorab Zialor in fer atraver ou Mr Speaker. Mon respekte son *mea culpa*. Ou konnen Nelson

Mandela ti dir ou koumsa pou dir en zonm ki *vacillate* sitan lo son prensip ou pa kapab *trust* li. I enportan sa. Si ou pran en keksoz, *you take the good with the bad*. Ou aste bef, ou bezwen pran dile, ou bezwen pran korn.

(Mr Speaker, eski Onorab Larue i kapab les mwan koze silvouple?)

(Interruption)

MR SPEAKER

Order silvouple. Yes Onorab Pillay.

HON SEBASTIEN PILLAY

Ou napa naryen pou dir li la?

MR SPEAKER

Ou'n fini dir li. Onorab Larue ou a gard lord silvouple. Onorab Pillay nou pe sot 30 minit. Mon konnen mon pa'n met *time limit*.

HON SEBASTIEN PILLAY

Mon pe ariv *a la fin* mwan.

MR SPEAKER

Selman mon ti ava apresye si ou ti ava konklir. Mersi.

HON SEBASTIEN PILLAY

Ou konnen, mwan mon kontan zot reaksyon. Mon kontan mannyer zot pe fer mwan. E zot pe zistifye egzaktaman sa ki

Richard Quest ti dir e sa se sa larogans pouvwar ki zot in gannyen. E pli ou tap mwan ek ou marto, pli mon pou lager kont ou. Pli ou tap mwan ek ou marto -

(Interruption)

MR SPEAKER

Sorry, Onorab mon'n donn ou 2 *warning* deza, laprosenn fwa mon pou demann ou pou sorti. Mersi.

Yes Onorab. *Ok*, nou avasilvouple nou avas fini sa deba annord *please*.

HON SEBASTIEN PILLAY

Ler nou koz lo nou listwar nou pei, nou bezwen pran tou sa ki'n pase dan listwar nou pei e met li an perspektiv.

Mwan yer swar i annan en msye ki'n *call* mwan e in dir mwan par egzantp, ler li in ekoute in tann lo sa zafer met pwazon dan delo *NYS*. *NYS* sa letan ti annan 2 vilaz. *Ok*. In pas lo *TRNUC* sa. Be eski ti pou normal pou pwazon ganny mete dan delo *NYS*, Nou pa koz lo la?

In osi dir mwan par egzantp, mersener ler ti vini ek zarm, mersener ti anmenn latizann, ti pe vin ek zouzou, dimoun pa ti pou mor? Sa osi

sa, personn pa demann pardon pou sa. *Ok?* Nou'n koz ek mwan lo met dife dan bis piblik.

(Interruption)

HON SEBASTIEN PILLAY

Mr Speaker.

HON SEBASTIEN PILLAY

Ou vwar, en Onorab ki pa kapab koz pou son distrik me profite zis pou vin fer komanter politik bonmarse dan Lasanble. Onorab ou'n ganny elekte pou koz pou dimoun, koz pou sa bann dimoun !

MR SPEAKER

Onorab Pillay, ou pe adres lezot Manm la. Ou pe adres Lasanble.

HON SEBASTIEN PILLAY

Mr Speaker, depi ler sa Gouvernman in vi o pouvwar, i annan plizyer size ki dan domenn piblik ki pe montre nou poudir i Gouvernman, i pe dir ou i pa oule vin pli Katolik ki Lepap e i pe repet egzaktaman bann menm fot lepase. I pe repet bann keksoz ki'n arive dan lepase.

Nou'n revwar larme retourn dan semen. Zot blanm nou pou larme ki ti lo semen. Ozordi Komandan ki ti ansarz enn sa bann kan i en gro

zofisye dan zot Gouvernman. Promosyon in ganny donnen. Mon pa'n tann ni Onorab Woodcock, ni Onorab Arissol, ni Onorab Hoareau, ni Onorab Naidu koz lo la.

Mon lentansyon bomaten sete fer lepep Seselwa konpran, poudir i annan en keksoz ki pa aziste avek sa lamannman ki pe vin devan nou. Mwan mon oule ki Gouvernman i pran li en lapros. Si oule pran en lapros kolektiv, pran en lapros kolektiv ki ava anmenn tou dimoun ansanm pou diskite sa size, e *come out clear* lo kwa ki pou fer. Pa blanm

Lasosyasyon Viktim si zot in form zot lasosyasyon. Sa i zot drwa. Pa blanm lezot dimoun pou eksprim zot lekor, sa i zot drwa. Annou viv sa vre demokrasi ki nou tou nou koz labous plen. Akoz apre tou sa ki kritik mwan e sa ki kritik ou i zot drwa.

E mwan mon oule met en keksoz devan Lasanble Nasyonal. I annan bann size pertinan ki devan nou. Par egzanp lo size en trezyenm mwan saler kot ou pe fer *performance appraisal* pou en trezyenm mwan saler, kot zanmen mon'n deza tande. Sa osi i kont drwa dimoun.

Dimoun in travay pou 6 mwan, selman oule fer

performance based appraisal lo la. E napa en *MNA LDS* ki koz lo la. Dezyenmman, *long service allowance* pou bann *teachers*, ki zot saler konparab avek lakantite travay ki ozordi zot pe ganny demande pou fer, nou pa koz lo la e sa i drwa dimoun.

TRNUC i montre nou poudir drwa dimoun, drwa dimoun i antre dan diferan *facet*. I antre dan zot travay, dan bann servis ki zot gannyen. Me zot pa koz lo la. Me par kont bann komanter *off-mic* parey Onorab Zialor pe fer, i pare pou li fer. Me koz pou dimoun i pa pare.

MR SPEAKER

Wi, Onorab Pillay. Onorab Pillay eskiz mwan. Mon konnen ou annan drwa koze. Me selman dan nou lareg deba i annan osi en mannyer limit deba pou reste lo size.

Mon ti a konpran si ou ti pe koz lo *Bill*, ou ti pe eksplike ki sa ki bon, ki s aki mal avek sa *Bill*. Me mon vwar en kantite repetisyon ki ou pe fer. En kantite pwen politik ki ou pe repas lo la.

So, mon pou demann ou pou konklir silvouple.

HON SEBASTIEN PILLAY

Mersi bokou Mr Speaker. Pandan mon lentervansyon, ti mon lentansyon pou gete ki kantite fwa ou enteronp mwan. Ti mon lentansyon pou montre dimoun ki kantite fwa ou pou enteronp mwan pou gete. Pou montre Seselwa ki kantite fwa ou anvi *allow* mwan laliberte lekspresyon. I kler poudir ou'n prouv mon pwen.

Dezyenmman, ti mon lentansyon pou regard reaksyon bann *MNA LDS*, pou dir bann keksoz ki pou fer sorti e montre zot reaksyon. Zot in montre zot. Zot in montre ki ler, *when it comes to* atak *US* zot pare, me ler *it comes to* defann lentera Seselwa, zot pa kapab.

So, mwan mon pe dir avek Seselwa, e mon pe dir avek tou dimoun ki'n *involve* avek *TRNUC*. Depi bann Komisyoner, e parey sa madanm ti dir, *TRNUC* pa'n neserman anmenn plis linite, i pa pou anmenn linite *as long* ki en kote i kontinyen servi *TRNUC* koman en zouti politik, pou li pini lezot dimoun oubyen pou anmenn vanzans kont lezot dimoun.

Sa ki neser, se ki sa bann dimoun ki'n ganny afekte i ganny en *redress*. *Whether be it* konpansasyon, *whether be it otherwise*, sa i ava en desizyon ki bezwen ganny pran.

Me non, nou bezwen konpran kote keksoz i ete. Koman Manm Lasanble nou pa ni konnen ki zistans sa rapor in arive. Nou'n tande rapor in ganny prezante, zanmen nou'n ganny sans vwar ni menm en lenteraksyon lo sa rapor. Apre tou, *TRNUC* ti komans kot nou. E koman Lezislater i enportan pou nou enterakte avek serten dokiman.

Bomaten mon'n ganny dir koman *Leader* Lopozisyon, mon pa ganny drwa, si mon Chairman *FPAC*, vin demann dokiman. Be Lasanble i par lao *FPAC*. Mon demann dokiman lo non Lasanble. E ler ou aprouv en kestyon, sa kestyon i vin propriyete Lasanble. Ler mon demande, mon demann lo non Lasanble.

Me ziska la i annan dokiman ki zanmen nou'n gannyen. So, dan lentera *Truth, Unity, National Reconciliation e moving forward*, akoz ki nou pa aprann, e sey *move on*. Esey fer keksoz pli byen.

E *in the meantime*, bann dimoun ki'n ganny afekte i a ganny en *redress* pou zot problemm. I a ganny en *redress* pou zot konsern. Akoz se zot ki santi, pa mwan ki santi.

Napa personn isi ki konsider *TRNUC* en *telenovela*. Napa personn isi ki konsider

TRNUC dan okenn fason. Sak dimoun i annan drwa eksprim zot lekor e zot lopinyon. Me ozordi dan nou pei in vin en staz kot si ou eksprim ou lopinyon kont Gouvernman, ou ganny maltrete, ou ganny viktimize, ou ganny vilifye.

E menm dan Lasanble Nasyonal, mon pou dir lo rikord, menm dan Lasanble Nasyonal, laliberte lekspresyon pe ganny *curtail*. E si bann *MNA LDS* pa ankor realize, mwan mon'n viv sa peryod atraver en Gouvernman. Zot pe komans viv sa peryod. E si zot pa pran en konsyans pou lager pou dimoun, pou fer sir ki listwar pa repet son lekor, listwar pou repet son lekor.

Mr Speaker, ou'n dir mwan fini. Mon ava konklir lo sa *note*, ler mon ti vot an faver sa Lalwa, e mon ti asiz akote Onorab Hoareau, ki ti eksplik mwan akoz i pe siport sa Lalwa, mon ti konvenki poudir direksyon ki nou oule ale a sa moman ti en direksyon ki pou anmenn nou ansanm.

Me apre ki en parti politik in *highjack* sa prosesis e fer li vin en demagozi politik, dan plas les li kot i ti ete e donn tou lotonomi e tou lespas pou sa komisyon fer son louvraz, nou ti ava annan pli bon rezilta. E nou ti ava'n vwar bann dimoun

ki bann viktim, ganny bann *redress*.

Mon swete Mr Speaker, ki nou mesaz i al ver Gouvernman. *Come out clear*, donn nou en keksoz konkret ki zot lentansyon anver sa ki *TRNUC* pe dir. E mon oule swet tou dimoun ki'n ekout mwan en bonn leres lazournen. Prezan ki zot in fini ekout mwan, zot in ekout sa lentervansyon ki *matter*, zot kapab deside *whether* zot pou kit zot televizyon oubyen zot radyo *on*. Mersi Mr Speaker.

(APPLAUSE)

MR SPEAKER

Mersi Onorab. Mon a donn laparol *Leader of Government Business*. Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour Vis-Prezidan, *Attorney Zeneral*. Bonzour tou bann Manm Onorab e tou dimoun ki pe swiv nou.

Mr Speaker, Labib i montre nou ki sa ki sipoze arive i arive, e mon ep sit an Angle '*in the fullness of time*'. Setadir ki sa ki merit arive dan lavi i arive zis ler i sipoze arive. Pa en segonn avan, pa en segonn apre. Me zis ler *timing* i bon. E

nou kapab dir ki i annan de legzanp ki nou kapab servi dan nou listwar, kot nou vwar keksoz ki'n arive, zis ler i sipoze arive.

Le 24 Oktob 2020 par egzant, ti en keksoz ki'n arive zis ler i ti'n sipoze arive. Kot ti pou annan en sanzman Gouvernman dan lape avek en tranzisyon vizib.

Si sa keksoz ti'n ariv avan kekfwa i pa ti pou'n ariv osi byen. Si i ti pou'n ariv apre, i ti pou'n tro tar. Me in ariv a zis son bon moman. Lalwa *TRNUC* dan sa Lasanble i en lot legzanp. En keksoz ki'n arive zis a son bon moman. Akoz, ti annan en Gouvernman koabitasyon dan sa pei ki ti'n fors de kote latab ki zeneralman opoz kanmarad, koz avek kanmarad. Antre dan en sityasyon kot ti pou annan en dyalog. In ariv in *the fullness of time*.

Kot *Leader* Lopozisyon in anmenn en Mosyon. *Leader* zafer Gouvernman ki ti asiz dan sa sez kot mwan mon asize ozordi, ti siport sa Mosyon e i ti menm vin lo Komite ki ti ganny kree pou montre, son lapartenans avek sa lavantir *TRNUC*. Tou Manm Lasanble Nasyonal ti *fall in* akoz nou tou nou ti konnen ki sa ti devret

arive, i ti devret ariv a sa moman.

E Prezidan Larepublik in donn son sipor sa Proze Lalwa pou fer sa keksoz arive. Tou keksoz Mr Speaker, ti'n alinyen e aliny dan en sel direksyon. Ozordi kot i annan en lamannman ki pe vin devan nou Lasanble pou demann avek sa Lasanble, swiv sa direksyon ki nou'n komanse.

Annou swiv dan sa semen ki nou ti'n met anmars e termin sa prosesis an donan en lekstansyon letan pou permet sa Komisyon konklir son travay, olye nou tou swiv legzanp sizyenm Lasanble avek sa de *Leaders* sa letan ek sa Prezidan ki ti asiz *State House* sa letan, zot in prefer fer sa vin en deba politik.

E mon regret sa anmerman Mr Speaker, akoz listwar pou ziz sa Lasanble Nasyonal e i pou ziz zot ki pe asiz lo lot kote latab, pou sa defayans ki zot in annan, ki zot pa'n annan vizyon pou swiv sa bann dimoun ki ti vin avan zot ti komanse. *History will judge you e history will find you wanting*.

Annou met keksoz kler Mr Speaker. Ozordi e yer zot ti annan en swa kler, siport sa prosesis oubyen al dan direksyon politik. Zot in prefer

al dan direksyon politik e pa swiv dan lepa bann gran akter politik ki ti mars avan zot. E zot pou pey la konsekans, krwar mwan byen.

Mr Speaker, sa ki nou annan devan nou la, se pa en keksoz politik, me mon konpran - mon konpran aköz zot, zot in bezwen oubyen zot in krwar zot bezwen fer sa ki zot in fer yer avek ozordi.

Ou vwar Mr Speaker, nou bann dirizan politik lo sa kote latab an 1991 e mon konnen ki ou, ou ti enn parmi - ti annan en vizyon kler. Aköz ki Parti Seselwa in komans koman en parti nouvo? Aköz ki i pa'n swa bann dimoun, i pa'n swa antre avek *SPPF* sa lepok e fer en karyer politik, oubyen antre avek *DP* sa lepok e fer en karyer politik?

Aköz ki ou avek bann dirizan sa lepok Mr Speaker, in deside tras en diferan semen e koman en parti politik *from scratch* ki ti annan zero sipor? Epi ti mont 4, epi ti mon 9, epi ti mont 27, epi ti mont 45, epi ti mon *State House*.

Aköz ki zot in fer sa Mr Speaker? Aköz zot ti konnen ki *SPPF* e *DP* ti annan en listwar ki nou pa ti anvi antre ladan. Se pour sa rezon ki sa parti politik ki la ozordi i en parti pir, napa

en dimoun ki'n perdi lavi aköz sa parti politik.

Onorab *Leader* Lopozisyon i dir dan be *SPPF*, bann Gouvernman avan in fer sa bann gran *building*, eksetera, tou sa bann lekol, tou sa bann lakaz zot in fer. Wi. Me tou sa bann lanmor ki zot in fer? Tou sa bann legzil ki zot in fer? Tou sa bann later ki zot in pran? Zot pa kalkile sa, zot pa regarde sa?

Mr Speaker, mwan mon a dir ou fran, si ti pou annan en batiman oubyen retourn Claude Monnaie lo later, mwan mon ti a prefere retourn Claude Monnaie lo later, pa annan mon batiman.

(APPLAUSE)

HON BERNARD GEORGES

Lavi i presye. Nou pa kapab *trade* lavi dimoun pou later ek lakaz. Nou pa kapab *trade* laliberte dimoun pou later ek lakaz.

E se sa zot problem, zot in pri dan sa latrap zot. Aköz sote, pile, vire, tournen, zot *SPPF*. Zot parti, zot pa pou kapab netwaye. Disan Mr Rene i lo zot lanmen, konpran sa!

(APPLAUSE)

HON BERNARD GEORGES

Tan ki zot pou rete dan sa *mindset*, tan ki zot pou reste dan sa parti, zot pa pou kapab re envant zot lekor. Sel fason se fer parey nou, nou ti fer, an 1991, tras en semen nouvo.

Mr Speaker, mon regrete ki sa legzanp ki Onorab Basil Hoareau - e mon mank Onorab Basil Hoareau dan sa Lasanble pou plizyer rezon. Me zot in mank sa legzanp ki li in donneren, kot in dir mon siport sa parti ki mon ladan, mon siport son prensip, mon dakor avek sa ki i pe fer. Me mon pa kapab siport son lepase aköz sa bann move keksoz ki in fer.

(APPLAUSE)

HON BERNARD GEORGES

Olye pran sa legzanp, ki zot ti'n kapab fer depi yer, swa an kozan, swa an restan trankil, zot in prefer defann lendefansib.

I annan en sel dimoun ki'n lev son latet isi dan sa Lasanble, dan sa deba Mr Speaker e sa se Onorab Naddy Zialor e mon dir ou Onorab felisitasyon.

(APPLAUSE)

HON BERNARD GEORGES

En sel boug ki'n annan kouraz pou dir, mon *sorry* mon ti dan sa *team*. Pa enn zot ki kapab fer sa. O kontrer zot in vin defann sa ki zot pa kapab defann.

E krwar mwan Mr Speaker. E mon pou dir li fran ozordi, pa krwar ki Mr Rene ti en bon boug. Pa krwar. Tir sa dan zot lespri. *TRNUC* in montre nou egzakte man kisisa ki ti motiv sa msye. E les mwan dir ozordi fran Mr Speaker - ou vwar, ou annan zenosid Rwanda, i pa ti byen, me nou ti kapab eksplik li aköz ti annan 2 rival, 2 etnisite ki ti pe lager ek kanmarad.

Nou regard *Cambodia*, tousala ti annan bann leksplikasyon aköz sa bann keksoz in arive. Me isi Sesel nou ti en pei demokratik, kot ti napa okenn rivalite dan kestyon etnik oubyen dan okenn lezot rezon. Ti annan en sel rezon aköz ki nou'n ganny en koudeta isi, se aköz en zonn ti laswaf pouvwar. Annou dir li e annou dir li kler.

(APPLAUSE)

HON BERNARD GEORGES

Aköz? li i ti'n lager pou lendepandans me se en lot Prezidan ki ti donn nou lendepandans. Alors li i ti

krwar mon bezwen pran sa ki man mon'n laager pou anmennen. Setou. Setou. E pou li reste o pouvwar in touye, in pran, in egzile, in fer martir, in tir laliberte dimoun.

Annou pa per pou dir li, akoz tousala nou'n aprann atraver *TRNUC*. Mr Speaker, enn bann keksoz ki fer sa ki'n arive isi dan nou pei pli pir ki sa ki'n arive dan bann lezot pei, malgre ki laba bann atosite ti bokou plis, enn bann keksoz ki'n fer ki sa ki'n arive isi Sesel pli pir, se ki i pa ti'n merite. Ti napa okenn rezon pou okenn sa bann keksoz arive.

(APPLAUSE)

HON BERNARD GEORGES

Akoz nou ti en pei demokratik anba en Konstitisyon demokratik e lepep Seselwa dan tou son laliberte ti'n vote pou lekel ki i ti anvi ki diriz sa pei.

Mon vwar zot tou zot *busy* lo zot telefonn ek zot *computer*, mon konpran. E en bann in sorti dan Lasanble tou e mon konpran. Akoz laverite i fer mal.

Me zot bezwen viv sa laverite. Sa laverite ki sizyenm Lasanble in ouver laport pou Lepep Seselwa, lepep Seselwa pou aprann atraver sa raport

TRNUC ki nou pe koz lo la ozordi.

Mr Speaker, mon pa bezwen retourn lo tou bann largiman ki zot in avanse pou defann pozisyon ki zot pou pran, ki mon sipoze i pou vot kont sa lamannman. Me les mwan zis mansyonn enn ou 2. Sa *TRNUC* la, nou tou nou ti konnen e nou tou nou ti admet ki i ti pou en *step in the unknown*. Personn pa ti konnen ki mannyer i ti pou deroule, ki mannyer i ti pou ganny apwente, ki laverite ki ti pou sorti.

Nou pa ti konnen sa. Me nou tou. Pep Seselwa an antye reprezante dan sa Lasanble Nasyonal a linanimite in dir i ti neserer pou nou antre dan sa lavantir. E ozordi pou tann en Manm Onorab ki ti dan Gouvernman avan, vin dir nou ki li i pa konpran akoz sa travay pa'n ganny fer dan sa 3an. Konmsi sa ti en Komite distrik ki ti pe al deside, eski nou pou annan en Lazournen Moutya oubyen non.

4mwan. I pa konpran ankoz ou bezwen ankor 4mwan, zot ti'n devret fini zot travay depi avan. Oubyen en lot vin dir nou akoz ki sa Komite pa'n regard tou bann lenzistis avan.

Mr Speaker, mon dir toultan e mon pou repete bomaten, akoz zot bezwen esper nou lamannman dan en Lalwa pou zot vin dir sa bann keksoz? Pandan 43an ki zot ti o pouvwar akoz zot pa'n anmenn en Lalwa pou regard deryer, pou al dan lesklavaz ?

(APPLAUSE)

HON BERNARD GEORGES

Akoz zot pa'n fer tousala? Lasanble ti dan zot lanmen. Dan senkyenm Lasanble ti annan zis zot apre en zwer lot kote. Akoz zot pa'n fer sa? Tou pouvwar ti dan zot lanmen pou zot al regard dan lesklavaz, dan tou bann lenzistis dan lepase, akoz zot pa'n fer?

Akoz zot bezwen esper ler nou, nou fer pou zot vin kriye annou al pli lwen?

Mr Speaker, mon regret pozisyon ki lot kote latab in pran bomaten e yer. E mon konnen ki lepep Seselwa pou regrete. E lepep Seselwa pou pini zot akoz zot desizyon ki zot pou al pran la ozordi. Sa mon konn tre byen.

I ti esansyel Mr Speaker, ki nou ti annan en *TRNUC*. Pa akoz nou anvi vanzans. Pa akoz nou ti anvi montre ki zot ti'n fer sa bann keksoz. Non. Me nou listwar i bezwen fer fas avek

bann keksoz ki'n arive pandan son deroulman. E sel fason pou fer sa se pou annan en rapor ki pou asize e ki pou la, ki pou met le pwen lo sa ki'n arive, pou ki tou dimoun, bann zenerasyon fitir, pou kapab vini epi lir.

E se pa zis *TRNUC* ki bezwen ekrire en rapor. Resaman ler mon ti pe sey ed, oubyen plito mon ti'n ganny demande pou ed en Profeser Lalwa dan en Liniversite Lafrik avek en *item* ki ti'n pase dan Komisyon Konstitisyonnel an 1992, nou'n realize ki napa rapor Komisyon Konstitisyonnel ki'n ganny ekrire. *It's not there.*

I annan bann *video*, i annan bann *transcript*. Me napa en rapor ki ou kapab tyonbo poudir vwar la rapor travay Komisyon Konstitisyonnel. *Wasn't done.*

Kod Sivil ki nou'n pase dan sizyenm Lasanble, napa rapor ki'n ganny ekrire. I pe ganny ekrire, sa mon kapab dir zot. Me i pa ankor ganny fer. E tousala se bann rapor esansyel. Se pour sa rezon ki i neserer pa pou vini pou dir akoz zot pa'n ekrire rapor dan sa 3an ki zot in gannyen. Me i esansyel ki nou donn zot letan ek resours pou zot kapab ekrire sa rapor. Akoz se sa rapor dan lefitir ki

pou montre lalang ki zot in koze dan sa Lasanble depi yer. Se dan sa rapor ki zot pou vwar tousala.

Sapit final Mr Speaker, i bezwen ganny ekrire. Annou pa bliye, annou pa bliye ki *TRNUC* i *stand* pou *Truth, Reconciliation and National Unity*. E sa lord sa 3 keksoz i enportan. Premye pwen se konn laverite. Dezyenm pwen se rekonsilye viktim avek *perpetrator*, Nasyon an antye, *de sorte* ki nou pou ariv lo trwazyenm letap e sa se Linite Nasyonal.

Mon kapab dir Mr Speaker, e tou Seselwa i a konnen ki premye pa *T, Truth*, laverite, se sa travay prensipal ki *TRNUC* in fer. Ozordi nou konn laverite. Ozordi bann paran Damandra, dan mon distrik i konnen lekel ki ti touy Damandra e ki mannyer Damandra in mor. Zot pa ti konnen avan, prezan zot konnen.

Fanmir Claude Monnaie i konnen aköz Claude Monnaie in ganny touye e zot konnen lekel ki'n donn lord, e zot konnen kote lord i sorti, *State House*.

(Off-Mic)

MR SPEAKER

Aret enteronpe silvouple.

HON BERNARD GEORGES

Me sa ki pli move, ki zot in aprann atraver lensidan Claude Monnaie se ki Komisyoner Lapolis ki sipoze pe defann sitwayen, li ki'n anvoy dimoun al fer sa misyon. Sa ki zot in aprann. Laverite Mr Speaker, nou'n tann tro laverite.

E sa laverite i devret fer zot fer parey Onorab Ferrari ler i ti en Onorab dan sa Lasanble, ti fatigue dir zot, "*Hang down your head in shame.*" Aköz se zot sikseser sa bann dimoun ki'n fer sa bann keksoz.

(Off-Mic)

MR SPEAKER

Mon pe dir ankor, nou ava aret enteronp Lasanble silvouple.

HON BERNARD GEORGES

Mr Speaker, laverite nou'n konnen e laverite pou ganny ekrire dan sa rapor ki ozordi nou pou donn letan pou li fini.

Parey Onorab Arissol in fer nou konpran, ler ti annan 7 komisyoner, la prezan i annan 5, Alors travay in vin plis lo sa 5 dimoun, zot bezwen en pti pe plis letan.

Me, me sa ki nou pa pou arive fer, akoz zot, zot pe met lobstak ladan se rekonsilye sa pep. Akoz tan ki zot pe anpes laliberte, latransparans ek laverite sorti par zot bann demagozi politik ki zot fer dan sa Lasanble, sa pep pa pou kapab rekonsilye. Parey mwan si ou anvi.

Ou'n ganny ou sans koze taler, pandan 30 minit pou pa'n dir naryen. Prezan les mwan koze.

(laughter)
(**APPLAUSE**)

MR SPEAKER

Onorab Pillay, mon'n demande pou nou aret enteronp silvouple. Konmsi ou pe fer ekspre pou montre poudir ou kapab enteronp. Mon pou dir ou aret enteronp silvouple. Mersi. Met ou lanmen anba.

Onorab Georges, ou a kontinyen silvouple.

HON BERNARD GEORGES

Mersi Mr Speaker. Mon pe konklir Mr Speaker. Mr Speaker, mwan mon'n aparet devan TRNUC plizyer fwa e mon'n al koz pou bokou dimoun ki'n ganny viktimize dan sa pei e donk mwan mon satisfè ki travay ki sa TRNUC in fer i en travay egzantler. E mon

konnen ki la mazorite, si pa tou Seselwa i siport sa travay ki zot in fer akoz ozordi zot konnen ki sa ki'n arive dan zot listwar.

E mon devret, mon pa kapab manke pou remersi tou bann dimoun ki'n travay lo sa Komisyon, depi son Sef ziska son drayver *messenger* pou sa travay e devosyon ki mwan mon'n eksperyanse ler mon'n aparet devan zot.

E mon anvi remersye osi tou bann viktim ek tou bann perpetrators ki'n annan kouraz pou vin devan sa komisyon pou fer lepep Seselwa konnen ki sa dezyenm repiblik ki nou'n ganny forse pou viv atraver depi 1977 ziska 1911, set en sapit byen nwar dan nou listwar.

E nou bezwen dir sa o e kler pou ki i pa ariv ankor ! E pou donk Mr Speaker, anmenn sa travay, ganny komanse a en konklizyon kot nou pou annan sa rapor e kot sa rapor pou vin devan nou Lasanble, kot nou pou kapab debat lo sa rapor, mon pe dir avek lot kote latab, kontan, pa kontan, vote, pa vote sa lamannman pe al pase la bomaten.

(**APPLAUSE**)

HON BERNARD GEORGES

Akoz si zot, zot pa anvi swiv sa prosesis ziska son lafen, nou lo

sa kote latab nou anvi e nou pou fer li. Mersi Mr Speaker.

(APPLAUSE)

MR SPEAKER

Mersi.

HON JOHAN LOZE

(Off-Mic)

MR SPEAKER

Napa point of order at this point
Onorab Loze. Mon pe demann Vis-Prezidan pou fer son repons lo deba. Mersi.

(Off-Mic)

MR SPEAKER

Vis-Prezidan, ou repons.

HON SEBASTIEN PILLAY

(Off-Mic)

MR SPEAKER

Non Onorab Pillay.

THE VICE-PRESIDENT MR AHMED AFIF

Mersi bokou Mr Speaker. Bonzour ankor *Leader of Government Business*. Leader Lopozisyon, tou bann Manm Lasanble prezan e tou dimoun a lekout.

Mr Speaker, mon'n asize ekout atantivman a bann diferan lentervansyon ki'n ganny fer depi yer. Mon ti a kontan remersye tou bann Manm ki'n koz an faver sa *Bill*. E onnetman mon bezwen dir Mr Speaker, ler mon ti vin isi, yer apre midi, vi ki sa lamannman i tre senp, i pe zis demann ki nou pous sa dat e prolonz sa peron ki *TRNUC* pou fer son louvraz ziska le 31 Desanm. Mon ti mazine i pou en deba ase kourt.

Mon osi ti pe espekte ti pou annan diferan lopinyon, par ler lemosyon ki ganny eksprimen dan Lasanble Nasyonal.

Me sa ki sagrinan pou mwan, se le fe ki sa lamannman ki nou pe anmennen ozordi, parey *Leader Government Business* in eksplike, i lo en *Bill* ki pe koz lo Laverite, Rekonsilyasyon e Linite Nasyonal. Me pou mwan ki'n asiz la pe ekoute, mon santi ki i annan zis en kote ki anvi, i pare pou ekout laverite. I pare pou koz lo rekonsilyasyon e in dir klerman ki i anvi anmenn linite nasyonal.

Pou mwan Mr Speaker, referans avek mwan menm, akoz mon'n ganny mansyonnen. Referans avek bann Manm ki dan Lasanble, ki

isi, ki zot in deza form parti sa ansyen rezim ki ti la. I pa relevan pou mwan.

Akoz i pa relevan? Akoz avan sa Gouvernman ti vin la o pouvwar an Oktob 2020 - e si ou *rewind* listwar, pou vwar poudir lopozisyon ti komans avek 4poursan. 2020, i ti'n ariv 54 poursan. Alor i kler ki napa zis detrwa dimoun ki la ki'n sanz zot lopinyon. I annan 50poursan popilasyon sa pei ki'n sanz zot lopinyon lo sa rezim ki ti la.

(APPLAUSE)

THE VICE-PRESIDENT MR AHMED AFIF

Me sa ki enportan pou dir, se ki sa 50 poursan dimoun, plis sa 4 ki ti la, zot in realize mon mazin - parski zot pa'n vot pou sa rezim ki zot ti abitye siporte, poudir i annan en meyer semen pou swiv.

Me non selman zot in dir i annan en meyer semen pou swiv, zot in dir zot afilyasyon avek en rezim ki'n fer en keksoz ki bokou zot pa ni ti menm konnen. E mon krwar dan sa Lasanble, napa en dimoun ki'n deza enplike dan lensidan mert, disparisyon e egzil dimoun.

Petet zot in sipor en rezim, wi. Me zot pa'n zanmen fer sa. Me sa ki pli enportan se

sa bann dimoun e mon ti a kontan felisit Onorab Zialor, ki e i annan lezot ki'n fer sa. Ki'n dir zot pa pou asosye zot avek sa ki ti arive. Zot aksepte la realite, zot pa ziz - zot pa ziz. Me zot aksepte sa ki'n arive akoz sa *perpetrator* in dir li menm wi i ti koupab. Ki zizman ankor ki ou bezwen? Sa *perpetrator* in aksepte poudir i ti koupab. Dan bokou sa bann ka ki nou'n tande.

E pou mwan si nou anvi anmenn linite nasyonal, enn bann keksoz ki enportan se ekoute, rekonsilye e anmenn sa linite ki enportan.

Mon'n komanse an dizan ki mon sagrinen, parski ler mon'n ekout sa kote latab i kler poudir swa zot pe inyor laverite. E mon pe dir laverite parski *perpetrator* in dir i koupab. Dan lezot nou pa tro konnen e rapor final ava dir.

Mon sagrinen ki non selman nou pa ekout sa ki'n pase. Me nou refize kondann okenn keksoz ki'n al mal. O kontrer nou dir i ti en *telenovela* oubyen i keksoz ki petet ti akseptab.

E mon santi sa kalite latid i pa pou anmenn pei dan sa direksyon ki sizyenm Lasanble ti deside pou vot lo la e ki Mr Faure koman Prezidan sa letan ti *assent* avek sa *Bill*,

koman *Leader* Gouvernman ki ti zot parti o pouvwar sa letan.

E zis anpasan mon bezwen dir ki mon annan gran respe pou Mr Faure, me mon pa krwar sa konparezon ant li ek Obama i zistifyab. Akoz malgre ki mon dir mon annan respe pou li, i mon zanmi ziska ozordi. Parski Obama in ganny elekte 2 fwa, me mon pa rapel kan Mr Faure ti ganny elekte.

Mon oule osi dir ki sa alegasyon ki Gouvernman pa pe konsilte avek Lopozisyon lo *Bill*. Be Gouvernman i fer son mye pou li koz avek Lopozisyon. I envit li, mon rapel tre byen, pa zis lo kestyon Lalwa. Ler ti pou annan *meeting* ant bann *Leaders* dan Lasanble avek Prezidan, pa pou vin donn zot lord, me zis pou koze. Pou anmenn linite. Dan lepase ler ti annan *meeting* par egzanp, pou envit zot pou partisip dan *COVID*, lo komite *Platinum*. Ler i annan bann levennman nasyonal kot Lopozisyon i ganny demande pou prezan. Ler i annan vizit ofisyel ki montre relasyon, pa ant en parti ek en lot - ant 2 pei, nou pa vwar sa kolaborasyon. Malerezman. Mwan mon pa vwar sa mwan. E mon santi napa okenn dezir pou kolabore, pou koze, diskite, pou konsilte.

Zot prefere dir, be fer ou zafer, apre nou, nou a vin koz ek ou. Be ki mannyer prezan zot vini, zot dir be nou, nou pa koz avek zot? Mon mazinen, parey sa lekspresyon i dir, ou kapab anmenn en bourik obor larivyer pou bwar delo, me si i pa oule bwar delo, napa naryen ki ou kapab fer.

(Interruption)

MR SPEAKER

Order silvouple!

THE VICE-PRESIDENT MR AHMED AFIF

Lo kote devlopman. Parski zot in relye sa *Bill* avek devlopman pei, kot nou'n dir poudir pei ozordi lo son *Development Index* i pe desann, mon ti a kontan zis *remind* Onorab ki mwan mon'n asize, mon'n ekout li byen. Mon pa'n enteronpe. Mon kontan asize, parski ler ou asize, ou ekoute ou konn laverite.

Mon ti a kontan remind li poudir dan devlopman tou pei pandan sa dernyen 2an i pa'n grosi. Tou pei. E nou, malerezman pou nou koman en Gouvernman nou'n antre dan pli move peryod ki ti annan. Kot lemonn antye ti pe fer detrwa pa an aryer parski lekonomi lemonn ti'n arete.

Me malgre sa, nou'n reisir vaksin nou popilasyon kan Lopozisyon ti pe senm lafreyer lo vaksinasyon. Nou'n reisi ouver nou erport boner Mars lannen pase, le 25 Mars nou ti ouver sa erport. Touris in retournen. Nou Dolar in sorti 22 in vin 14. Pa devlopman tousala?

Tou Seselwa ki pa ti pe travay, ti lo *FA4JR*, in retourn travay. E mon kapab dir zot ozordi tou Seselwa ki anvi travay i kapab travay. Trezyenm mwan in tournen lo latab. Sa lannen pou annan. En bout ki lo performans, en bout ki pou garanti.

Bidze ozordi, i tir en gro *defisit*, pros ki 20 pousan *GDP*. Ozordi i pou preski balanse. I ankor negativ, me i pou preski balanse. Nou'n pey tou nou det dan sa peryod ki pei ti'n anfonse. Ozordi dimoun ki zot pe dir pe soufer en kantite, Gouvernman in met R500 tou le mwan pou serten dimoun, kategori dimoun.

Ozordi sa pei ki nou pe dir devlopman i pe desann, i premye dan lemonn pou laliberte lekspresyon. Premye dan lemonn. Premye dan Lafrik pou lager kont koripsyon. E dan Laverite, Rekonsilyasyon, Linite Nasyonal, i annan en kantite keksoz ki'n montre ki

kantite koripsyon ti annan. Me ozordi zis dan 2an nou vin premye dan Lafrik, nou bat Moris tou. Eski sa i pa apel devlopman?

Mr Speaker, mon bezwen dir sa bann detrwa mo, parski mon pou repet eki mon sagrinen, mon santi sa direksyon ki Lopozisyon in koze, ki petet zot pa pou siport sa *Bill*. Me erezman nou annan en kantite dimoun dan sa Lasanble ki pou vot an faver. Mon santi zot pou vot an faver, pa parski okenn dimoun i donn zot en lord pou vot an faver, me parski zot konsyans i dir zot poudir sa travay ki nou pe ganny, e ki nou ti a kontan i kontinyen pandan 4mwan i en travay enportan pou sa pep.

Mon dernyen komanter Mr Speaker, i zis lo detrwa dout ki ti ganny eksprimen, sirtou lo eski sa Komisyon avek 4 mwan prolongasyon pou kapab fini son travay. Sa ki mwan mon'n ganny dir par Komisyon se zot pou fini zot travay. Napa naryen ki garanti, me si zot resours i la e zot resours i la. Si zot lekipman, tou keksoz reste parey i ete ozordi, wi zot pou fini zot travay. Zot in dir nou zot kapab fini Desann.

Eski pou annan plis larzan ki pou bezwen ganny verse pou zot kapab fer sa

travay? Non. Akoz non? Akoz ler zot Bidze ti aprouve lannen pase pou 2022, Gouvernman ti'n deza fer en provizyon si zanmen zot pa fini an Out, ki ti'n donn zot en *full year budget* ki anviron R16 milyon. R15milyon 997mil. Alors zot annan en Bidze, i pa pou kout ekstra.

Alors Mr Speaker, mon ti a kontan ki Lasanble i siport sa lamannman, pou prolonz peryod travay *TRNUC* pou ariv pli tar le 31 Desanm sa lannen. E ki avek sa zot permet sa pep pou fer sa lot lepa pou nou konn laverite, pou annan rekonsilyasyon e pou annan linite nasyonal. I enportan pou sa pei geri son lekor. Sansan nou pou kontinyen lager ek kanmarad, nou pou kontinyen per laverite e sa pa pou anmenn pei devan. Mersi bokou Mr Speaker.

(APPLAUSE)

MR SPEAKER

Mersi Vis-Prezidan e a sa pwen mon ava envit bann Manm pou vot lo *Bill* lo *Second Reading*. Manm ki an faver lev lanmen silvouple? Mersi. Manm ki kont? Mersi.

Vot lo *general merit Truth, Reconciliation and National Unity*

Commission (Amendment) Bill, 2022 - 23 Manm in vot pour, 10 Manm in vot kont e napa abstansyon, *Bill* in aprouve lo *general merit*. Madanm Clerk mon ava envit ou pou fer *Second Reading*.

MADAM CLERK

Mersi Mr Speaker. *A Bill for an Act to amend the Truth, Reconciliation and National Unity Commission Act, 2018, to extend the mandate and term of the Truth, Reconciliation and National Unity Commission.* Mersi Mr Speaker.

MR SPEAKER

Mersi Madanm Clerk. Donk *Bill* in aprouve lo *general merit*. Mon vwar dan rapor *SBC*, savedir *Scrutiny of Bills Committee*, pa televizyon. Dan rapor *SBC* zot napa amannman pou propoze. Mon pa konnen si i annan okenn Manm ki annan okenn. Napa okenn Manm ki'n soumet amannman, me selman si i anna okenn, i annan *technical points or anything*. Si napa, dan sa ka mon a demann Onorab Georges pou prezant Mosyon pou *waive Committee Stage*.

HON BERNARD GEORGES

Mersi Mr Speaker. Mr Speaker, anba *Order 97(1)* nou *Standing*

Orders, mon pe *move* pou ganny ou permisyon pou sispann *Order 70 a 75* dan en fason ki nou kapab sot Staz Komite. Mersi.

MR SPEAKER

Mersi. Mon a ganny segonnman silvouple. Onorab Arissol.

HON SANDY ARISSOL

Mersi Mr Speaker, Mosyon i ganny segonde.

MR SPEAKER

Mersi. Manm a vot lo sa Mosyon? Manm ki an faver lev lanmen silvouple? Mersi. Manm ki kont?

Lo Mosyon *to skip Committee Stage* lo sa *Bill, 23* Manm in vot pour, 0 kont e 10 Manm in *abstain*. Donk Lasanble in aprouve ki nou *skip Committee Stage*. E avek sa mon a demann Onorab *Leader of Government Business*, ankor enn fwa pou prezan Mosyon pou *Third Reading*.

HON BERNARD GEORGES

Mr Speaker, anba *Order 76(1)* mon annan gran loner e satisfaksyon bomaten pou *move* ki *the Truth, Reconciliation and National Unity Commission (Amendment) Bill,*

2022 i ganny lir en *Trwazyenm Fwa*. Mersi.

MR SPEAKER

Mersi. Mon a ganny segonnman pou sa Mosyon? Onorab Sandy Arissol, wi.

HON SANDY ARISSOL

Mersi Mr Speaker. Mosyon i ganny segonde.

MR SPEAKER

Mersi. Mon ava demann bann Manm pou vote. Manm ki an faver lev lanmen silvouple? Mersi. Manm ki kont?

Vot lo *Formal Third Reading Truth, Reconciliation and National Unity Commission (Amendment) Bill, 2022 - 23* Manm in vot pour, 10 Manm in vot kont, 0 abstansyon.

Alors mon kapab deklare ki *Bill* in pase par Lasanble.

Bon avan mon remersye mon a demann Madanm Clerk pou fer *Formal Third Reading*.

MADAM CLERK

Mersi Mr Speaker. *This Act may be cited as the Truth, Reconciliation and National Unity Commission (Amendment) Act, 2022 and amends the Truth, Reconciliation and National Unity Commission Act*

2018, the principal Act. Mersi Mr Speaker.

MR SPEAKER

Mersi. Mon a remersye tou manm pou zot partisipasyon e mon remersye Vis- Prezidan e *Attorney General* pou travay avek nou lo sa *Bill*. Lasanble nou a pran poz e nou a re pran travay 11er edmi.

(BREAK)

MR SPEAKER

Mon a donn laparol Hon Wavel Woodcock.

HON WAVEL WOODCOCK

Mersi Mr Speaker, Mr Speaker i responsabilite okenn Gouvernman, ki vin o pouvwar pou met bann fasilite neseler an plas, parey pou fer semen pou *maintain* semen.

Annefe nou'n anba plizyer Gouvernman Franse, Angle. Anba Gouvernman Angle, semen in ganny fer. Ler Gouvernman *SPUP*, in vini, *SPPF* ozordi *US*. Zot in kontinyen lo sa travay, zot in fer semen.

E la ki nou annan en nouvo Gouvernman, i nou devwar e nou responsabilite pou nou kontinyen, pou fer semen, *maintain* bann semen e kontinyen fer fasilite ki nou pei

i bezwen. Irelevan ki fasilite, i kapab semen, i kapab lakaz, i kapab lopital, i kapab bazar. Nenport ki fasilite ki nou pep i bezwen, i nou responsabilite pou nou met bann fasilite an plas.

Mon pou komans mon entervansyon par koz enn pti pe lo en proze semen - annefe ki pe preokip Praslin antye. Grand Anse avek Baie Ste Anne Praslin. Sa i proze, Pasker Laplenn *Hollandaise*. Annefe en proze ki ti sipoze komanse depi 2019, e en proze ki mon'n koz bokou lo la longman.

Ti annan bann alokasyon bidzeter dan lepase.:- 2020 ti annan 7.8milyon, 2021 ti 5milyon e lannen pase, pour sa lannen ki la i R2.7 milyon, ki en pti pe redwir konpare avek lannen presedan.

Be menm si i annan sa alokasyon bidzeter, Lepep Pralinwa i santi poudir sa proze, i pe i pa pe bouz lo sa *pace*, ki nou ti a kontan vwar li bouze. Annefe i merit annan en *oversight* par *SLTA* lo sa proze, pou fer sir ki sa kontrakter, pe *meet* kondisyon dan son kontra pou fer sir ki sa proze i konplete i ganny delivre *on time*.

Subject to li osi, ki negosyasyon ki sipoze annan, antre *SLTA* avek *PUC*, i *ongoing*. Zot in fini *sort out* sa *issue* kot

Laplenn Hollandaise kot sa *water catchment* i ete.

Mon priye ki tou negosyasyon in fini konplete ki i pa pou vin en *issue*, ler nou ariv sa faz sa semen. Mr Speaker, pou pa mal lannen, semen in en konsern Nasyonal, in en konsern Nasyonal dan nou pei.

E nou Gouvernman osi in pran li koman en priyore, pou fer sir ki sa bann semen ki nou'n deza annan, i ganny *maintain*, ki bann konsern ki'n ganny souleve dan lepase parey *issue* drenaz, parey nou'n vwar dan lepase, i ganny rezourd.

Annefe nou ti annan sa *issue* problem drenaz lo kote Pointe La Rue, ki'n ganny rezourd. I annan bann proze lagrandisman semen, *roundabout* lo Mahé e Praslin. E i enportan pou nou kontinyen sa travay, ki'n komanse par bann Gouvernman avan nou.

E depi sizyenm Lasanble mwan Mr Speaker, mon'n demann, mon'n pouse pou plizyer proze dan distrik, menm lo Praslin an antye. Parey mon dir enkli sa proze Pasker Hollandaise.

E nou'n vwar sityasyon semen pou plizyer lannen, dan plizyer landrwa, ki i annan serten travay deza ki'n komanse.

Annefe i annan enn de landrwa priyoreter parey Consolation, travay in pran en nouvo lelan, en nouvo frekans. Mon'n vwar poudir, re-sirfas semen Consolation in rebran. Anse Boudin i osi en landrwa priyore ki, osi ki *SLTA* i merit konsider li koman en priyore.

Sa semen Anse Boudin ki pou ariv, ki fini Anse Lazio, i en *five-star destination*, ki i nesesit en louvraz irzan ganny fer lo sa semen.

Mr Speaker pandan sa sizyenm Lasanble, mon rapel mon ti pe pouse, pour *resurface* sa semen Vallée de Mai, travay ti ganny fer. Me petet sa travay pa'n ganny fer dapre sa standar ki nou ti a kontan i ganny fer. Ki ozordi i nesesit, serten travay pou amelyor sa semen.

E deza parey mon'n dir, i annan serten bann travay ki *SLTA* in komanse, deza. Ki *ongoing as*, mon pe koze la. Consolation enkli Grand'Anse. Ki i annan en plan, pou re-sirfas semen lo Praslin an antye.

E dapre konversasyon, ki mon annan ek Mr Volcere, e *CEO* Herath. I annan plizyer lezot travay, ki pe al osi komanse byento, en pe an kolaborasyon avek Gouvernman Lokal. E en pe bann travay lo bann diferan

semen segonder, partou lo Praslin e enkli dan mon distrik Grand Anse.

Parey en konparezon en travay ki vreman, neseser ki i annan napa letan ki napa en *proper* renovasyon i ganny fer, se sa semen lo beton St Joseph, ki enkli proze drenaz ki annan diskisyon avek Gouvernman Lokal. Ki anefe nou'n met lo lalis proze pou lannen prosen, pou *SLTA* sipoze komans se travay *anytime* la.

Pou resirfas semen lo beton St Joseph e drenaz, travay drenaz i pou ganny antreprann par Gouvernman Lokal lannen prosen. Parey mon'n dir i annan plizyer bann semen segonder, ki'n deza konplete dan sa dernyen 2an 3an.

E zis mon pe mazin *on top of my head* la, i annan bann semen ki dan lepase ti ganny *funded* par anba *India Grant*. La mon pe mazin semen La Modestie, semen akote Oasis pou al dan fon kot Mis Monica ek madanm Jeannevole.

Enn de bann konplesyon bann semen Amitié, lo blok. Semen o bor Lekol Praslin Segonder, ki al dan fon La Rivière Cacao.

E en keksoz ki mon realize, ki i kout bokou enn ler pour Gouvernman Lokal

antreprann sa bann semen, parey pou fer semen avek beton. E i fer plis sans pou fer semen avek koltar, aköz i pli bon marse, ki pou al semen an beton, ki pou bezwen kontrakter e siman tousala i kout enn pti pe pli o ki ler ou pou met tarmak, ou pou met koltar.

En konsern ki nou'n vwar, nou'n fer fas avek, ki mon prezimen i osi en konsern plizyer lezot distrik, kot i konsern mankman bann *surveyors* pou *survey* bann semen.

E sa en ler aköz sa mankman *surveyor* i fer ki nou ganny en pe retar, pou *survey* bann later, pour ki bann later i kapab ganny pase e fer bann landrwa kot i sipoze al lo sa *alignment* ki sipoze ganny fer.

E sa en keksoz ki met nou Gouvernman, i bezwen konsider pour investir plis dan bann *surveyor*. Tou sord kalite *surveyors*, *land surveyor quality*, *quantity surveyors*. Sa i bann *area* ki i annan en pe mankman.

E ansanm avek *DA*, nou'n idantifye plizyer lezot semen segonder Grand Anse. Sa i enkli dan plizyer bann sou distrik Coco Rouge, Amitié ki annan ki sa bann semen ki pou materyalize sa lannen menm.

I annan semen ki nou'n mete lo lalis proze, ki pour lannen prosen. I annan ki pour lo lalis proze pou en pe letan. Me i annan ki ki'n fini konplete, parey semen Cherimont ansanm avek son *crash barrier* in fini ganny fer.

E parey mon dir enn lot konsern se, parey Pointe La Rue in fer fas avek, nou osi nou annan sa *issue* drenaz. E i enportan ki avek plizyer bann semen ki'n konstrir ki pou annan bann proze drenaz *adjacent* avek sa bann semen. La mon koz parey mon'n mansyonnen lo beton Joseph, *Eden Spring access* ki pe al komanse *anytime* sa lannen la. E lezot landrwa ankor.

E i osi annan bann semen ki osi enportan dan Bel Air nou annan, ki akot lafanmir Cushion. Menm si i annan bann kontrent ki nou pe fer fas avek an term *topography*, e bann lezot *issue*, konsern parey mon'n dir *wayleave*, me selman mon pe sey *sort out* pou met sa bann semen an plas. Parske dan plizyer rezyon, menm dan Mont Plaisir nou annan bann landrwa ki nou pe travay lo la. E parey enn de bann Manm in mansyonnen, en konsern ki annan dan distrik ki Gouvernman i merit get ladan,

sirtou *SLTA*, se lalimyer dan distrik.

I annan bokou bann *blind spot*, bann landrwa kot i en pe fernwar, petet bann madanm ki sorti travay aswar zot pa santi zot an sekirite. E malerezman ozordi i annan serten landrwa, ki napa poto elektrik. Akoz bann poto dan bann distrik i swa *PUC* ki mete, ouswa *Cable and Wireless*.

Me *SLTA* zot menm, zot pa pe met sa bann poto, ki fer ki annan bann landrwa ki nou pa pe kapab met lalimyer, akoz i mank poto.

E mwan mon santi, ki *SLTA* osi i merit zwe, i bezwen *going forward* get dan posibilite pou met bann poto dan bann landrwa, kot napa poto elektrik. Pour zot met bann lalimyer lo la, dan bann *blind spot* la ler mon pe mazine.

Semen ki pas dan fon Bake Yaya, mon pe mazin Amitié pas dan fon kot Ton Morley. Mon pe mazin Lablache Estate, dan fon Lablache Estate ki enn pti pe fernwar, i annan enn de bann zabitan ki'n vin kot mwan avek *DA*. Ki zot dir zot bezwen en pe lalimyer.

E dan lepase i malere Mr Speaker, ki nou'n gannyen lalimyer, dan lepase. Me ti annan bann donasyon ki nou ti gannyen avek Gouvernman *La*

Chine, ki malere ki preski tou sa bann lalimyer in brile. Ki ozordi nou bezwen, bann lalimyer ki nou pe gannyen. Sa tou distrik i ganny alokasyon tou le lannen.

Nou bezwen rebran sa bann lalimyer ki nou pe gannyen, pou ranplas sa bann lalimyer ki ti'n ganny enstale oparavan. Mr Speaker prey mon dir i annan plizyer bann proze, ki pe vini. E i annan Manm ki'n osi koz lo trotwar. E mwan osi mon santi poudir i annan serten landrwa, ki aktyelman nou vreman bezwen. I annan kot, *ex casino* Anse Volbert pou al Cote D'Or, i annan St Mathieu, ziska kot pas House 2000 pou al kot, lafanmir Bristol. E sa i bann *issue* ki nou bezwen gete.

En lot keksoz ki pe afekte semen ozordi se, sa *issue* lerozyon lo lakot. E nou distrik in ganny afekte a plizyer repriz semen in grennen, enkli - la mon pe mazin Amitie vizavi SPTC kot i annan en *rock armoring* ki'n ganny fer.

Me malerezman, i pa'n ganny fer dan en fason ki byen. Ki ozordi menm si i annan en alokasyon Bidze 54milyon pou nou kapab *extend* sa *rock armoring*, nou bezwen gete si nou pou kontiny *extension*, ouswa si nou pou bezwen refer

sa *rock armoring*, ki en gaspiyaz.

Akoz bann proze *rock armoring* ki'n ganny fer dan lepase, i pa'n ganny fer dan en fason - parey mon'n dir i pa'n ganny fer lo en serten standar, ki neselit refer en pe travay renovasyon lo la.

So an zeneral Mr Speaker, mon satisfes avek lelan - nouvo lelan lo Praslin, ki *SLTA* in pran, pour resirfas nou bann semen. Si nou kapab *sort out* sa bann *issue* parey enn de Manm in koz lo la *wayleave*, bann *surveyors*, fer sir ki bann travay ki ganny fer i lo standar. Ki pe neselit retournen, fer sa bann travay ankor.

Mon krwar nou pe al dan bon direksyon. E mon swet *SLTA* bann travayer lo Praslin tou kouraz. E nou pe ekspekte zabitan Praslin ki nou semen an antye, sa bann semen ki nou bezwen, enkli semen primer i ava ganny resirfas, dan en fason ki byen lo en standar, ki bann trafik. Nou zabitan lo Praslin i kapab servi sa bann semen, byen.

Avek sa de mo Mr Speaker, mon pou siport sa Mosyon. Akoz i en Mosyon ki bon, e mon dir ou mersi Mr Speaker.

MR SPEAKER

Mersi Onorab. Mon a donn laparol Onorab Audrey Vidot.

HON AUDREY VIDOT

Mersi Mr Speaker. Mr Speaker devlopman imen ek lenfrastruktir i parmi bann prensip fondamantal *United Seychelles*.

Nou bann lakonplisman, devlopman semen lo nou bann zil, loportinite lanplwa ek ledikasyon pou nou bann zonn ek fanm Seselwa, ki'n kontribye dan devlopman lenfrastruktir semen, dan Sesel i levidans konkret sa 43an ki *United Seychelles*, in la.

Me travay pa fini la. Ozordi en lot Gouvernman ki la, e i annan sa responsabilite, pou amelyor e fer pli byen, dan devlopman nou bann lenfrastruktir semen dan pei.

Mr Speaker i tris pour nou tou, ler nou vwar en kominike Lapolis anons aksidan fatal lo semen. E kot nou trouv plizyer dimoun i ganny swa perdi zot lavi, oubyen si i ganny sans viv, i vwar li parfwa pe viv avek en dezabilite.

E mon sezi sa loportinite pou mwan zwenn mon bann koleg Onorab, pou mwan eksprim mon senpati avek tou manm fanmir, zanmi e konesans ki'n perdi en pros, ou

menm plis atraver bann aksidan fatal.

Mr Speaker, malerezman semen *highway* Roche Caiman, i enn bann semen lo Mahé ki'n annan plizyer aksidan fatal. A plizyer repriz dan mon bann ladres dan Lasanble Nasyonal, espesyalman dan letan Bidze, kot mon'n fer demann avek Lazans Transpor, pou rod Bidze neserer pou enstal en *crossover bridge* pou Roche Caiman, parey zot annan lentansyon enstal enn Providence.

Pou asir sekirite piblik, ki bezwen traver semen sorti kot vilaz Roche Caiman pou al Stad Linite kot bann fasilite sportif. Mon swete ki Minis pou Transpor, ki pe swiv deba ki'n komanse depi ozordi bomaten, oubyen son bann zofisye, pe pran bann rekomandasyon ki ganny fer resorti lo tou lede kote latab dan en fason pozitiv.

Pa fer parey serten koleg, kot nou'n vwar kantite ka swisid ki nou'n demann zot pou zot pran konsiderasyon, vwar ki bann striktir zot kapab ranforsi, pou siport nou bann nou pep pou zot kapab sorti dan bann depresyon ki zot ladan. E nou pa bezwen esper sa kantite ka, pou nou pran aksyon serye.

Alors mon mesaz pour Minis pou Transpor avek son

lekip, pa les annan plis aksidan, pli serye agrandi pou nou kapab vwar kot apre pou zot al fer en pon, pou kapab fasilite. En *bridge* pou kapab fasilite bann dimoun ki koup Stad Linite.

In annan plizyer lensidan, kot transpor in kit semen lo *highway* Roche Caiman, in fini dan kanpes o bor lakaz bann dimoun ki zis o bor, ki vir ek Stad Linite.

I regretab osi, kot nou'n vwar nou vwar i annan drayver ki pa redwir zot *speed*, ler ek zot vites ler zot ariv kot sa *crossing* ki ganny servi par kominote Roche Caiman, pou swa pou al kot laboutik, oubyen aste gas, kot Victoria South Fuel Station. Oubyen bann travayer ki kot *PUC*, oubyen kot *NSC* ki servi sa semen toulezour. An dizan sa mon le osi lans en lapel, avek tou manm piblik ki pe swiv nou ozordi ki swa ou en drayver, ouswa en pyeton pou ou osi pran responsabilite e pli byen servi bann siny ki'n ganny enstale e marke lo trotwar ek semen pou asir sekirite.

Bann travayer ki netway semen, e bann lezot ankor ki travay zot louvraz i permet zot bezwen travay otour grannrout pou zot osi, servi zot bann fasilite lekipman, sekirite pou asire ki zot evite. Akoz tou

resaman nou'n vwar kot i annan ankor endividi in perdi zot lavi dan pe leve debourye, atraver aksidan lo *highway*.

En lot lanfaz mon le mete dan sa deba, se bann diferan Lazans ki annan manda, pou anpese ki piblik pa ilegalman enstal bann lobze personnel dan semen piblik, san okenn lotorizasyon Gouvernman - mon repete san okenn lotorizasyon Gouvernman.

An dizan sa, mon bezwen fer resorti konsern ki zabitan mon distrik, bann paran lekol Plaisance Segonder e Primer, enkli bann ansennyman ki'n met devan Lotorite Distrik, konsern - bann problem ki zot rankontre, trafik dan larantre vilaz Roche Caiman.

Kot transpor i blok semen, e vin en lenkonvenyans pou zot kapab antre sorti. Levidans nou'n vwar kot lanbilans in pran li pli s ki 15 minit, pou li antre, menm sorti dan vilaz pou anmenn pasyan lopital.

E nou swete ki napa okenn lensidan dife dan sa bann ler, byensir pou anpese ki pou kapab kree en lenkonvenyans pou Lazans *Fire Brigade*, antre oubyen sorti, pou kapab sov okenn ka danze dife dan vilaz Roche Caiman, dan bann ler parey.

E mon sezi osi sa loportinite, pour demann zofisye Gouvernman espesyalman bann ki'n travay tre pros avek Ladministrasyon Distrik, ki'n fer vizit apre vizit, zisteman pou met bann konsern devan zot. E zot menm zot ki'n adres serten *issues* ki zot ti ava voudre ganny adrese.

Me nou ankor pe esper zot depi lafen Out, pour zot kapab don Lotorite Distrik zot bann rekomandasyon, bann konsern ki zot in souleve, pou Lotorite Distrik kapab fer lot pa pou demann Gouvernman, pou pran aksyon, pou kapab vwar en solisyon pou sa bann problem ki annan dan sa larantre vilaz.

Mr Speaker, pou konklir avek bi amelyor lenfrastruktir semen, mon pe demann avek *SLTA* pou evite ki bann drenaz, pa ganny bouse letan i annan resirfas semen. Akoz Roche Caiman nou osi nou rankontre bokou problem.

Espesyalman sa ron pwen ki sorti kot *Victoria Fuel Station* pou desann an direksyon pou al dan distrik Plaisance. Bokou fwa nou'n ganny rapor avek piblik e menm zabitan, ki ler i pe al travay dan bomaten si i annan gro lapli, zot vwar zot bezwen retournen re al sanze akoz transpor i zot delo lo zot.

Nou swete ki sa lagrandisman semen ron pwen ki'n ganny fer Plaisance, Roche Caiman, i kontinyen pour ki bann dimoun ki tonm dan vilaz, dan distrik Roche Caiman dan direksyon Brilliant, ki zot osi zot ava benefisye avek elarzman semen, pou annan en *proper* pyeton ki permet bann zanfan ki sorti dan sa rezyon, ki al lekol osi byen bann piblik ki servi sa semen granmaten, pou fer zot legzersis. E ki *SLTA* osi dan son bann programn mentenans mon osi mon pou tous lo kote lalimyer.

SLTA i bezwen regarde osi bann kalite lekipman, ki serten bann kontrakter i servi, prenon kont ki dan mon vilaz Roche Caiman, in annan en kantite problem. Kot bokou fwa lalimyer, pa dir bokou letan. E nou pe demande, e ankor i pran letan osi pou ganny repare.

E mon pou terminen pour mwan osi dir mersi. Mersi tou travayer enkli dan sekretarya *SLTA*, bann ki lo *field*, ki fini ziska kot bann ki parey nou koleg in fer resorti, lizour koman aswar pe donn tou zefor, posib pou zot fasilite tou dimoun pou kapab ganny akse avek semen pou li ariv swa kot li, swa lot destinasyon.

E nou remerci zot pou zot zefor, zot travay dir ki zot pe fer.

E ki zot osi dan revizyon zot bann kondisyon, Gouvernman i regard byen pour ki zot osi, zot pa zanmen ganny kit deryer pou zot travay dir ki zot fer. Mersi Mr Speaker.

MR SPEAKER

Mersi Onorab. Onorab Georges nou pa pe tenir, ou privez koz dernyen ozordi. Ou annan laparol.

HON BERNARD GEORGES

Mersi Mr Speaker. Non mon pa pe tenir sa privez. Akoz mon pou koz briyevman Mr Speaker. Me i pa ti mon lentansyon, me mon remersye ou pou donn mwan laparol. Akoz i annan de ou trwa pti keksoz ki mon santi mon bezwen fer sorti.

Semenn pase parey mon ti anonse, yer bomaten, mon ti pas en semenn *Ghana* e Mr Speaker, nou, nou koz lo trafik isi. Nou koz lo letan ki nou pase, dan semen, dan trafik, pri dan trafik. Me si nou al *Ghana*, nou al a realize ki mannyer nou, nou an bon. E zansla laba.

Akoz nou, nou pas kekfwa maksimonm 1erdtan, 1erdtan edmi. Mon dan sa 5 zour ki mon fer *Ghana*, mon'n konte pou sorti *x* pou al *y*, pou sorti *x* pou al toulezour, mon pas mwan 20 erdtan, zis dan trafik! E donk

annan de fwa nou konplent, nou annan rezon konplent.

Me i annan ki bokou, bokou pli *worse off* ki nou, e mon kontan sa sonn alarm ki'n ganny sonnen, ki si nou kontinyen a sa nivo, enport loto san ki nou *improve* nou konpleks semen, nou pou *end-up* parey *Ghana* ek bann lezot pei, ki pli dan mal.

Mr Speaker sa topik lo sa Mosyon ki Onorab Georges Romain in anmennen, i en ki difisil pou pran en kote e *ignore* lot kote.

Akoz i annan bokou bon keksoz ki'n ganny fer, e tou sa ki'n ganny dir lo *SLTA*, lo bann travayer ki travay dan sityasyon difisil. Pou met koltar lo semen. I vre, me osi mon krwar e se pour sa rezon ki mon anvi, pran laparol.

Mon krwar ki, i annan *room for improvement*. E mon krwar ki, *SLTA* i ava eksepte, ki malgre tou zot zefor - e zot fer bokou zefor. La mon regarde *recently* ler zot in fer resirfas, *roundabout* Plaisance, 10er, 11er diswar zansla ti ankor pe travay pe met koltar pou kapab arive fini avan son landmen bomaten.

E sa, lo en *weekend* Mr Speaker, ler nou, nou pe anmize nou pe mont tar kot nou, zot, zot ankor dan semen

pe travay, alor nou bezwen dir mersi. E tir nou sapo avek sa bann dimoun.

Nou bezwen aksepte ki ler zot fer en keksoz byen, zot vreman fer en keksoz byen. E mwan mon krwar ki en legzanp, en zoli travay se sanmenm sa *roundabout* Plaisance. E la byento nou atann, avek enpasyans en lot zoli travay ki zot pe fer, lo sa dezyenm *lane* lo *highway* ki pas lo pon Rochon. E mon vwar nou tou nou'n aksepte ki travay in al vit, in al byen. E nou espere ki travay, pou a nou satisfaksyon. Donk nou bezwen dir mersi.

Me akoz i annan en 'me', nou bezwen osi aksepte, ki annan serten mankman. Mon pa pou repet sa ki'n ganny dir, *speedbumps* ki pa standar partou, ki napa ase lalimyer lo bann *zebra crossing*. Ki osito ki en semen in fek ganny met en zoli sirfas lo la, zot retournen zot kas li ankor, akoz i annan en tiyo pou pase, oubyen i annan en koneksyon telefonn pou mete. Tousala se bann keksoz ki pa devret pe arive.

Me se pa sa bann keksoz ki'n fer mwan pran laparol, apre midi. Set en lot, en lot keksoz en pe pli larz. Mr Speaker mon pa arive, aksepte pou sa kantite larzan ki nou depanse pour nou rezo semen, premyerman ki

nou pa kapab annan bann semen ki lo standar.

E la mon krwar ki nou tou nou ava aksepte, ki sa morso semen ant *roundabout* Eden, avek pon Providence, nou ti a kapab fer bokou pli byen ki nou'n fer. I pa ti devret annan sa kantite laroul ladan, e i pa ti kapab, nou ti kapab met bann laliny en pe pli drwat ki sa bann laliny ki nou'n fer.

Napa en rezon, nou pa pe blanmen, me napa en rezon akoz nou pa'n kapab fer li pli byen. E kekfwa enn bann rezon, akoz i pa'n arive, se ki nou'n vwar *SLTA* pe met en bout koltar apre i ale i al met en lot bout Takamaka, *somewhere*.

Apre trwa semenn pli tar i vini, i remet en lot bout ankor, i pa lafason apropiye. Mon pa la pou mwan donn zot leson, lo ki mannyer pou fer semen, mon pa en eksper ladan. Me mon la poudir sa ki bokou piblik pe dir, se ki sa morso semen avek sa pri ki in koute, nou'n ti a'n kapab fer li bokou pli byen. E nou merite annan, semen ki pli apropiye. Premye mwen Mr Speaker.

Dezyenm pwen ki mon ti anvi e finalman mon dernyen pwen, se sa enn swivan;- lo lot kote latab mon krwar zot pou kontan, sa ki mon pe al dir, akoz nou bezwen rekonnèt ki wi

Gouvernman presedan, in fer en kantite semen dan nou pei.

Annou pa sey fer krwar ki i pa vre akoz i vre. Bokou semen segonder in ganny fer partou, ki'n asire ki teren in ganny devlope pour konstriksyon, eksetera. E sa set en bon keksoz.

Me akoz i annan en 'me' - me, dan bokou ka sa bann semen, sa ki nou lo sa kote latab, e kekfwa zot osi lo lot kote latab zot ava apel semen Eleksyon. Bann semen, ki ganny fer en pe an vites akoz i annan en Eleksyon ki pe vini.

Annou koz fran, nou tou Seselwa e nou tou nou pase lo sa bann semen. Zot in fer en kantite bon semen, me zot in fer en bann osi ki vreman ase danzere. Swa zot apik. La lotrozour mwan mon'n al ek mon madanm, nou'n al vizit en zanmi. E dan mon *jeep* mon pa'n kapab mont sa semen, akoz ti tro apik malgre ki i ti en semen ek koltar, nef e nou'n glise. I annan mon krwar serten defayans la, kekfwa kot nou ti kapab amelyore.

E mon'n dir sa pou mwan dir sa dernyen keksoz la ozordi;- Semen Agricole dan mon distrik i en semen ki nou kontan, i en semen ki ti neser, i en *bypass*. E la sityasyon amelyore akoz

roundabout Plaisance in degaz en pe lasasen.

Me ler trafik ti bloke - Onorab Cosgrow i konn sa tre byen, akoz i servi sa semen. Bokou dimoun ti pas atraver sa Semen Agricole, koup atraver Les Mamelles pou zot kapab sorti lo semen Plaisance e vin anvil san ki zot bloke dan semen La Louise.

Me sa semen li menm li i en semen tre danzere, akoz i annan de *hair band* ki si, a mwens ki ou dan en *i10* oubyen enn pti loto, i pou difisil pour ou pase, e i danzere si ou zwenn en lot loto ki pe monte.

Alor malgre, ki Mr Speaker nou bezwen rekonnèt e nou bezwen felisit bann dimoun ki ansarz fer, e repar semen e *resurface* nou semen, akoz zot merite ganny sa rekonesans, nou bezwen osi dir zot silvouple *from now on* al enn pti kekfwa, enn pti pe pli dousman. Me fer keksoz enn pti pe pli byen, pour ki nou kapab annan bann semen, ki konvenab.

Dernyen mesaz Mr Speaker mon ti anvi remersye *SLTA*. E la mon bezwen met lo rikord ki sak fwa ki mwan mon bezwen zot dan mon distrik pou zot fer enn pti bout *resurfacing*, oubyen pou fer enn pti *car park* eksetera, zot toultan reponn lapel. Alor mersi enfiniman.

Avek sa detrwa mo Mr Speaker, mon ti a kontan reasir Onorab Romain ki i pou ganny mon sipor lo son Mosyon. Mersi.

MR SPEAKER

Mersi, mersi Onorab Georges. Mon a pas laparol Onorab Sathya Naidu.

HON SATHYA NAIDU

Bonn apre midi Mr Speaker, mersi Mr Speaker. Bonn apre midi tou dimoun, St Louis ki a lekout. Mosyon anmennen par Onorab Romain i annan son merit e son relevans. Annefe ler mon'n li sa Mosyon mon'n dir, otomatikman i annan kek presyon lo mwan osi pou koze. Akoz sa size, ki i konsern nou tou. Nou tou nou mars dan sa soulye ki apel *MNA*.

E tou nou bann dimoun i ket devan plizyer konsern. E sa la kot nou sey angaz avek *SLTA*, pou nou kapab rezourd sa bann problem. E mon le felisit *CEO* Herath e tou son bann travayer. Plizyer Onorab in dir parey, e si lezot Departman i travay lo menm nivo parey *SLTA* i pe fer avek bann distrik.

Mon krwar Sesel an antye nou pou'n kapab bouz ver lo en nivo pli, akseptab, e rezonnab kot ou kapab vwar progre osi. E ler bann lezot Departman, i

annan mankman an term korperasyon ou kapab poz serten kestyon kot ou demann ou lekor, akoz. So mon swe ki lezot departman i kapab pran en legzanp lo *SLTA*.

Lo size ki'n ganny soumet lo kote, semen ki ganny konstrir dan Sesel, i annan plizyer mon bann koleg ki'n soumet zot konsern kot zot in dir, ler i annan bann semen segonder, lo staz konsepsyon, lo nivo koman en proze.

Bokou fwa zis akoz en dimoun, en kominote an antye, i ganny pran otaz. Malgre ki i kapab annan kek negosyasyon ki distrik i kapab fer. Si sa dimoun i kontinyelman dir non, mon pa pare pou donner, mon krwar in plis ki ler pou nou kapab itiliz lenstriman legal, sa se lakizisyon later dan lentere piblik.

Onorab Georges li menm a de repriz, dan Lasanble in fer resorti sa pwen. E mon rapel repons, Minis Antony Derjacques. E mwan mon ti a swete ki *he walks the talk*, akoz in pis ki ler. Akoz lo nivo nasyonal i annan en kantite proze, segonder ki'n vin lo en nivo kot in vin lo en *standstill*, e lekel ki pe ganny afekte, se nou bann dimoun la.

Gran mazorite nou bann dimoun dan nou bann distrik.

E mon swe se ki, ler sa Komite Miltisektoryal i pa zis lo Transpor, lo kote Later osi zot vin ansanm. Zot kapab delibere e met devan bann pwen pou kapab pran bann desizyon.

E ler bann desizyon pou ganny pran i ganny pran dan en dele letan, ki rezonnab. Ou pa pe kapab met sa de kote poudir, *it's the same case as any other case.*

Sa bann ka ki pou ganny prezante i pou bann ka, ki eksepsyonnèl. Alors i pou bezwen annan serten mezir, kot ou kapab *fast track* pou kapab adres sa dilenm. Parey *LGB* ti'n fer resorti in annan kantite devlopman lo kote *US*, lo kote bann proze semen ki'n ganny antreprann.

Me selman parfwa ou demann ou lekor, espesyalman mwan demann mon lekor sa kestyon, eski in annan serten proze semen ki pa'n demare, senpleman akoz politik, senpleman pour ser dimoun?

E mwan mon poudir, kontan pa kontan lo lot kote lata, sa ki mwan mon'n vwar. Dimoun in ganny promet semen, me selman ler ou al regard *file* napa ni en *A4* ladan.

Me selman pandan sa dernyen 2an in annan progre ki'n arive. Ler mon pe dir mankman lavolonte politik,

mon pe dir lo kote Legzekitiv. Akoz mon predeser lo kote Lezislativ in fer tou sa ki i kapab. Me ozordi zour nou annan nouvo fason travay, kot *DA* avek *MNA* i travay ansanm. E mon ti'n fer lesansyel pandan 6 mwan ki madanm Rachel Joseph ti la, Onorab Pillay. Me malerezman, si en dimoun pa pare pou travay, i annan serten desizyon ki li osi i bezwen pran pour li, kapab bouz de lavan.

Lo size, *maintenance* bokou fwa nou vwar i annan bann *patchwork* ki ganny fer, e pli tar semen i bezwen ganny kase, apre refer. Mon sel kestyon se pour konbyen letan eski nou pou kontinyen avek sa pratik? Eski i soutenab a lonterm? Konbyen ti pe kout pei? E pli boner, mon ti'n fer referans avek bann proze semen segonder. E ti a bon si *SLTA* osi i kapab osi vin avek en rapor poudir pour sak distrik, *this is the distance we are at* an zeneral.

Kot nou kapab ganny rapor ki pou dan lanmen tou Manm Lasanble Nasyonal, pou fer sir ki, *they are also taken to task*, dan en serten form. Pou si asire ki demen, mon pa prevwar ki pou annan en sanzman Gouvernman.

Me selman *at least*, nou pou konnen ki nou annan bann

dokimantasyon ki pou siport travay ki'n ganny fer dan lefitir osi. Akoz mon pe partaz mon leksperyans personnel, kot in annan mankman dokimantasyon.

E alors nou bezwen *start from scratch* e ler sa i arive, se en pep ki ganny met an retar. Ler nou pe koz lo sekirite, lo semen bokou in ganny dir lo *crash barrier*, lo *signage* e plizyer lezot. Selman responsabilite ki bann drayver i bezwen pran. Mwan personnelman mon'n vwar en kantite, neglizans lo kote semen, lo lafason ki ganny itilize. E mon krwar, i bezwen annan en mekanizm lo kote *Licensing*, kot nou entrodwir en sistenm pwen, pour penaliz bann drayver, ki pa pe swiv bann regilasyon trafik. E byensir pour konplimant sa, ou pou bezwen annan en bon sistenm *camera*.

Nou pa pou kapab zis annan bann *camera* lavil ki la koman bann dekorasyon. Me bann *camera* ki operasyonnel. Nou bezwen osi parey Onorab Wallace Cosgrow in dir, itiliz teknolozi byensir. Dan sa letap kot nou'n arive, mon krwar menm *speed cameras, would be of essence*, pou nou kapab bouz de lavan vizavi sa.

Nou annan en Lalwa an plas pou *deal* avek bann *derelict vehicles*. Me selman bokou fwa nou vwar nou bann menm garaz ilegal ki pe *operate* o bor semen, san okenn lanrezistremman ofisyel, ki pe al kont plizyer lezot lorganizasyon, tel ki Lotorite *Planning* e bokou plis ankor.

E sa osi i ede pou koz konzasyon trafik, e se la kot mon demande, pa neseserman responsabilite *SLTA*. Me lezot lazans pou pran zot responsabilite e fer zot devwar. Akoz demen pa egzantp kot semen Waterloo Basen, si demen i annan en dife, i annan kek lensidan grav i arive, i pou annan fatalite. E alors i enportan pou nou kapab adres bann problem. E kot napa demarkasyon, sa ki en Zofisye Lapolis i dir mon pa pou kapab fer nanryen semen pa'n ganny demarke.

Me mon krwar, par ler i bezwen annan en nesosite pou en Komite Miltisektoryal pou regard dan bezwen tou bann distrik, *across the board*. Pou nou kapab vwar aksyon pe ganny pran. Lotorite Distrik pa pou kapab monte desann, pe sey adres menm problem. Ozordi zour sa i pa akseptab.

E ankor enn fwa lo kote sekirite semen, mon fer resorti

ki bann drayver bezwen responsab. Menm bann *pedestrians* zot bezwen responsab lo kote nivo konportman. Konbyen fwa nou'n sanz bann *convex mirrors*, mon'n perdi kont. Zot tant pou kase. Me *how are you going to take people to task?* Be byensir, se al kot *camera* i antre ouswa bann lezot dimoun ki vwar sa dimoun ki'n fer sa, i vin soumet son konsern devan. Ouswa i desann Lapolis, dan plas zis *call* mwan poudir sa in arive. I pa ede.

Ler mon pe regard lo kote resirfas semen, mon apresye ki'n annan plizyer Onorab ki'n mansyonn St Louis. Lotorite Distrik St Louis, i ti'n soumet en demann poudir, nou ti a voudre ki semen i ganny resirfas. E en zoli travay in ganny fer. Drayver, plizyer dimoun in dir felisitasyon. Annefe felisitasyon pa pou mwan, se pou bann travayer *SLTA* ki'n travay *weekend*. Se bann travayer ki'n travay Mardi, Merkrede. Malgre ki annan plizyer, ki'n soumet zot konsern atraver rezo sosyal.

Me solman parfwa osi i bezwen annan kek korperasyon, osi pou nou kapab antreprann kek devlopman. E mon ti a zis profite poudir zabitan Serret,

mon konnen pou en pe letan zot pe atann. Tre byento, travay i sipoze komanse Serret pou nou kapab resirfas semen.

Alors se sa bann pwen ki mwan, mon ti a voudre pou soumet lo Mosyon Onorab Georges Romain. Mersi.

MR SPEAKER

Mersi Onorab. Bon mon ava aprezan pas kot Onorab Doyace Porice.

HON DOYACE PORICE

Mersi Mr Speaker. Bonn apre midi a tous. Mr Speaker mon pou sipor sa Mosyon anmennen par Onorab Romain, akoz mon santi ki i en topik vreman valab.

Kot i konsern konstrir, mentenir semen en lenfrastruktir, pou sekirite transpor e manm piblik dan Sesel parey Mosyon i demande. In annan bokou ki'n fer, ki'n ganny fer e pe ganny fer aktyelman. E osi bokou pou fer.

Mr Speaker ler mon get nou semen prensipal lo Praslin Anse Kerlan, Grand Anse, Baie Ste Anne, Consolation, Anse La Blague, Cote D'Or Anse Lazio e osi Salazie, sa bann semen son lenfrastruktir i annan bokou pou fer.

Mon konnen i pa fasil pou fer tou en sel kou. E mon konnen ki nou popilasyon pe

agrandi. E nou annan plis transpor, lo semen. E osi plis dimoun ki servi semen.

Mr Speaker, mon pou dir ki i annan en pe travay lo semen ki pe ganny fer, Consolation, Vallée de Mai e osi Grand Anse. Be Baie Ste Anne, Anse La Blague, Salazie, Anse boudin pou al Anse Lazio pa ankor tous ditou. Petet mon panse pe vini.

Me pa zis semen, i osi konsern trotwar *bus stop*, *speed bump*, *zebra crossing*, *crash barrier*, lalimyer eksetera. Tousala i manke Baie Ste Anne, zabitan e osi drayver pe konplent. Sirtou kot landrwa, ki danzere pou pase lo semen. Parey i annan sa bout ki, komansman lasose an desandan ziska dan krwaze Baie Ste Anne. La nou santi ki i mank en bout vizavi avek kordgard, pou met en *crash barrier*. E sa ti'n merit ganny mete depi lontan.

Mr Speaker i vreman danzere, kot nou ti'n kapab byen lontan met tou sa bann lenfrastriktir. Sa ki konsern mwan plis ankor se *bus stop* ek trotwar, kot nou'n napa ase. Menm si nou pa kapab, fer bokou *bus stop*, me o mwen nou zabitan ti a kapab, annan en bon trotwar pou debout lo la pou esper bis.

Akoz nou zabitan, pe debout dan rigol, kot i vreman fermal. Lapli, soley, divan, moustik, zot bezwen esper bis. Zot napa swa. I en bann lenfrastriktir ki ti'n merit fini ganny fer.

Nou konnen ki nou pei pe pas dan difikilte finansyel. Me nou konnen ler pei, a rebran, Gouvernman pou aranz nou zil. I annan semen ki'n komans e pa fini. E sa i vreman mal.

Mr Speaker mon santi ankor enn fwa, ki Praslin in ganny neglize kot i konsern semen ek son lenfrastriktir. E sa mon pou ensiste Minister konsernen, pou evalye byen avan zot komans en semen oubyen son lenfrastriktir.

Pour ki nou kapab kontinyen *maintain* li. Vi ki Praslin, nou ganny bokou touris e bann biznesmenn pe benefisye, alor mon pou sipliy avek zot osi, pou ed Gouvernman, avek en pe bann lenfrastriktir pou benefis zot menm, e zabitan Praslin. Akoz Praslin i annan semen ki pa mank bokou letan pou ale avek lanmer.

E mon'n raporte plizyer fwa, bann semen ki depi lansyen lepok, ki nou Gouvernman i bezwen revwar. Avek sa de mo, mon pou siport sa Mosyon. Mersi.

MR SPEAKER

Mersi Onorab e mon remersye tou bann entervenans pou tenir nou program. Wi i reste nou de, wi Onorab Aglae, ou tour. Mon pas ou laparol.

HON EGBERT AGLAE

Mersi Mr Speaker. Bonswar tou dimoun ki a lekout. Mon kontribisyon lo sa Mosyon Mr Speaker. Dabor mon ti a kontan remersye Onorab Georges atraver ou Mr Speaker, pou fer konnen poudir Gouvernman lepase in servi en pe sa larzan, pou met en pe dan nou lenfrastruktir, semen ki preski nou tou nou kapab ariv devan nou laport.

Mr Speaker, mon osi mon le felisit tou bann travayer ki'n travay dan domenn konstruksyon semen isi dan sa pei, depi plis ki sa 43an pase, e si i annan ankor ki pe travay, kontinyen sa bon travay ki zot pe fer.

Mr Speaker Mosyon devan nou, i anmenn nou dan bann letan, kot nou bezwen get lavenir lo sityasyon nou semen, e sityasyon trafik, ki ankor dan detrwa lannen, nou pou vwar nou dan serten difikilte si nou pa vin avek bann bon program, e planifikasyon.

Mon dir sa Mr Speaker, akoz ozordi dan *psyche* ki en motoris, ouswa ki ou en pasaze. Se pour mwan sorti pwen 'a' pou al pwen 'b', dan en dan en kour dele letan. San okenn gran lobstak, dan mon semen ki kapab koz okenn danze. Sa i en realite ki'n nou tou ki dray en transpor ti a swete vwar. Me i pa le ka. Akoz?

Avek devlopman e kondisyon lavi nou pep, nou pe vwar poudir ki deplizanpli in annan plis transpor ki'n antre lo semen. E avan COVID Mr Speaker, ti annan anviron 1200 transpor par lannen ki ti pe ganny anrezistre nef. Ki fer ki 100 transpor, par mwan ki ti pe ganny met o semen, isi Sesel.

E pour sa pti Sesel, sirtou sa pti Mahé pour nou sa, i pou poz serten konsern a lavenir. E se sa ki ozordi, nou pe vwar bann gran, gran anbouteyaz partou parey Franse i dir. Ki fer ki nou bezwen trouv solisyon dan imedyat, fas a kalite semen ki nou annan e osi anmenn bann inovasyon.

Me sa Mr Speaker pou kapab arive, i merit annan pli bon planifikasyon i pa zis SLTA, avek bann lezot Departman osi ki konsernen dan devlopman pei, ki swa MLUH, ki swa PMC ki swa bann lezot Lazans ki antreprann bann devlopman,

pou fer sir ki i annan sa armonizasyon dan devlopman semen isi Sesel.

E osi lo ki grander semen ki nou krwar i nesese, pou *cope* avek ankor 20an-25an isi. Me tousala i bezwen ganny resours. Kote resours pou sorti Mr Speaker? Se *tax payers money* ki pou bezwen peye, pou annan sa bann lenvestisman ladan.

Dan lepase, *road fund license tax* ki nou pye letan nou al teste nou transpor, ouswa anrezistre en nouvo transpor, ti ganny dir pou ganny servi pou aranz nou bann semen. E i annan anviron R200milyon plis ki ganny anmase, par lannen avek sa servis avek *SLA*. Me sa R200milyon li menm li i pa al ver *SLTA* pou fer mantenans semen. I ganny rapatriye dan nou sistenm rezim *tax*.

Pou osi kapab osi azout, avek bann lezot servis ki pei i bezwen. Mon konpran sa parfetman. Me ideoloji par deryer sa, sete pou kapab annan pli bon fasilite pour nou kapab sirkile, dan en fason ki nou transpor i kapab *last* pli long, san bezwen fer bann gran *maintenance* sak fwa, ouswa tou-le-z-an ki ou bezwen al fer en *road worthy test*.

E se sa ki pe arive ozordi, akoz i annan serten semen ki

pa lo en nivo e ki pe koz serten danze avek bann veikil, e tou drayver i konsyan sa. Sirtou bann ki pe roul lo larout toulezour.

Alors Mr Speaker, mon krwar i annan en nesese pou nou revwar serten alokasyon resours, pou nou kapab *at least* donn sa servis sa Lazans ki nesese.

Semen in ganny fer wi, semen in pas partou dan sou distrik wi. Me solman i annan defi, defi mantenans ki nou bezwen pran kont pou kapab met semen dan en fason byen.

Lot size mon krwar mon pou bezwen touse Mr Speaker, lakoz ki bann semen parfwa i vin dan bann tel sityasyon. Nou annan nou bann servis, litilite ki pas zot bann lenfrastruktir an servan semen.

Eski i pa'n ler pour zot adopte, annan zot prop servis koridor, parey dan bann bokou pei i annan ki a kapab avek letan rezourd sa problemm kot semen pe zis, koltar fek mete apre nek zot kase?

I annan en konversasyon, ti'n deza ganny met devan *PUC* lo sa size, i dir pou kout tro bokou larzan. Be i kout larzan osi pour ou kapab zis met koltar, apre ki ou ou'n vini, ou'n kas semen. Mon krwar nou bezwen annan en plan, konkret

ek en plan ki *étaler*. Ki pou kout larzan, be si ou komans pti gin par pti gin dan 10an, 15an ou'n kapab etabli ou servis koridor.

E pou napa neseseite ki zis semen i kase akoz delo ouswa ou pe reget ou bann kab ki ou'n pase, ki swa telefonn ouswa laliny elektrisite. Mon krwar sa en refleksyon ki nou bezwen fer e Gouvernman i bezwen met li an kont.

Lot size, i size *parking*. Lakantite transpor parey mon'n nonmen ki fer ki, nou pou annan plis problem *parking* a lavenir e i deza en problem ozordi.

E dimoun i park lo semen akoz napa fasilite, ouswa napa en landrwa pour li mete. E sa osi i koz problem, sekirite lo semen pou motoris e pyeton. So sa osi bezwen ganny adrese, lo en plan lonterm. E si nou pou koz *lo street light* Mr Speaker, *street light* i en keksoz ki enportan, sirtou pou nou bann dimoun ki pa neserman pe pas dan en transpor. E ki marse, ki swa apre ler.

Me selman, annou regard *street light* osi avek son benefis e osi son lot bout kot i konsern lenerzi. E si nou koz bokou akoz se *tax payers* ki bezwen pey sa *bill street light* avek PUC. Mon krwar i enportan pour nou kapab rod bann fason pli

inovativ pou kapab eklere. Nou'n deza komanse avek *solar light*, ki mon mazine en pe letan pase ,ti annan en lakonpanyen Sinwan ki ti bann donasyon.

Me i pa ti'n neserman mars parey nou ti swete, akoz rezon *maintenance* e ki ler ou ti pe rod zot, pou zot fer *maintenance*. E ki ler ou pe rod zot dir be mwan mon'n donn ou. Ou prezan rod ou fason e SLTA, ki ti napa sa kapasite osi pou li kapab *maintain* sa bann *street light* koumsa, in bezwen revwar li retourn dan son *street light* konvansyonnel ki i ti pe servi avan.

So si nou pou rod *solar light*, annou rod en partner kredib. Nou a investir ladan, e i ava annan en proses, *maintenance* ki ava ganny fer, ki ava *save* nou en pe larzan kot i konsern lenerzi.

En lot faktor Mr Speaker i pou terminen lo sa size, i annan osi bann Lazans ki ede sipoze pe netway semen, ki pou fer semen vin prop, sen e sof parey nou dir. Me ki parfwa ou vwar poudir, avek bann servis ki pase lo semen, sirtou bann konminyon ki saroy bann materyo konstriksyon. E tanzantan, ou pase dan en landrwa ou vwar en pe makadanm, ou vwar en pe

lapousyer ros in tonbe. E pour sa i koz serten danze.

E pour nou kapab rezourd en pe sa sityasyon, pou asir sekirite lo semen pou anpese ki aksidan i arive, se annan en bon zesyon kot i konsern sa bann netwayman semen. E mwan dan en distrik ki sirtou dan rezyon Morne Blanc Sans Soucis, i annan pa mal sityasyon, ki vini sirtou ler lapli i tonbe. E semen i glise, e ou annan bann fey ki lo semen, e sa osi i poz bann konsern. E zabitan i fer, bann konplent devan.

So Mr Speaker, Mosyon i byen, i pe al dan en bon direksyon. Me osi nou bezwen konpran kapasite resours, ki nou pe donn sa lazans pour li kapab enplimant. Ozordi nou annan bann bon teknisyen, bann bon enzenyer ki *graduate* ki'n vini. E mwan mon swete ki zot ganny sa sans, osi pou anmenn sa bann lespri inovativ, ki zot in gannyen dan zot bann letid enzenyer - bann letid eksper pou zot kapab vin devan.

E mon konpran poudir, osi parfwa i annan nide ki vini ki byen, me ki pa ganny aksepte. Petet mon konnen si resours ouswa sa ki la, la li so *much years* i la, i pa pe vwar sa

koman en plan lonterm pou lavenir.

So nou bezwen komans ekoute, si nou bezwen met bann *overpass* kot i nesaser. E mon'n tann *CEO* dan en *interview* ki in dir, si nou met *overpass* nou bezwen mont en pe peron. Be peron pa touy dimoun li, lontan nou ti mont peron pou nou ariv se nou. Ler ti napa semen loto. Mon konpran poudir ou pe mazin bann dimoun pli aze, me ki kantite dimoun aze, petet ki pou *cross*? Mon pran en legzanp kot i annan lekol o bor semen, tou kou i annan konzesyon.

E lekol nou konnen lekol ki al zis zenn ki al lekol, napa dimoun 63an ki pe *cross* pou al kot en lekol. Me si ou'n kapab kot en lekol - mon pran en legzanp san menm la o bor nou avan nou vini, pou al kot lekol prive. E i annan de. Si i annan posibilite, pou mete pou zanzan kapab *cross over*, e sa i a rezourd en gran konzesyon trafik, dan bomaten. E apre ler sirtou dan *peak hours*.

E kot bann lezot lekol osi kot i annan fezabilite pou fer, *why not*? Fer nou bann *trial* annou gete si pou marse. E ava sov nou, bann motoris osi perdi letan dan trafik, konsonm plis *fuel*. *Fuel* ki deza pri i ser, ou pe perdi *fuel* osi dan trafik. So i

bann keksoz ki nou bezwen ekoute etidye, e fer plan met resours. Avek sa Mr Speaker mon dir ou mersi.

MR SPEAKER

Mersi Onorab Aglae. E mon a prezan pas laparol, Onorab Sandy Arissol.

HON SANDY ARISSOL

Mersi Mr Speaker. Mon krwar i annan en kantite keksoz ki'n ganny dir atraver sa Mosyon. Mwan osi mon ava bref dan mon deliberasyon, zis parey bann lezot koleg in fer.

Mr Speaker Mosyon pe koz an relasyon avek semen - en size ki'n enteres tou Manm lasanble Nasyonal, e sakenn dan son fason in sey enterpret li, kwa ki li i santi byen, e kwa ki santi i devret amelyore.

Me kestyon ki reste deor, se ki bann dimoun i demande se, eski sa kalite koltar ki nou pe servi ozordi, i apropiye pou nou kalite klima ki nou, nou annan? Eski par egzansp bann makadanm, ki zot met ladan ki zot servi, eski pa tro pti, si fondasyon pa stab?

Oubyen eski i pa enportan pou nou annan en masin ki tir vye sirfas koltar, pou stabiliz son baz, e apre remet nouvo sirfas, zis pou nou pa ganny sa ban problem, ki nou pe

gannyen dan bann distrik, ki nou tou nou'n tann koz lo la.

So tousala i bann propozisyon ki dimoun i demande ki zot fer. Parske i retourn osi lo sa size sa CC ki nou peye koman drayver zisteman, pou amelyor bann fasilite semen, ki annan lo Mahé, Praslin e mon'n tann mansyonn La Digue.

E la Digue zot osi, zot annan zot fasilite semen, me selman parfwa sa ki manke lo La Digue, sirtou anler Belle Vue, zot mank en pe lalimyer an relasyon avek *Land Transport*. Sirtou letan ou ariv anler semen fini kot Georgie Constance kot Pamela, kot Merna laba, i mank en pe lalimyer.

Parske i annan en restoran zis anler e touris, i frekante. Mon mazin en son Onorab avek DA, avek Lotorite konsernen zot pe fer le nesesite pour ki La Digue osi, i vin menm paz avek nou, isi lo Mahé.

Mr Speaker letan nou pe koz semen i annan plizyer keksoz ki asosye avek *SLTA*. Sa se lalimyer, pon, drenaz, bann *crossing*, *crash barriers*, *resurfacing* ki bann Manm in koz lo la..

Apré mon krwar i devret annan sa *road naming*. Kot nou kapab - *Land Transport* avek

bann lezot Lotorite, i kapab annan antre dan sa *name* bann semen. Par egzanp ‘*Welcome to Bel Ombre*’, ki mon'n vwar Mont Buxton avek Au Cap zot in komanse, atraver *Local Government*, en distrik atraver *Local Government*, ki mon krwar sa osi i devret form parti *Land Transport*.

Letan zot pe antre dan resirfas semen sa osi letan zot pe met bann siny ki dirize kot ou pou ale, si *left*, si annan *roundabout* par devan, si annan en pti *curb*, mon krwar sa osi, i ava enteresan pou *Land Transport* mazin lo la, avek lezot Lazans an relasyon avek sa travay ki zot fer. Apre i annan sa ki nou apel bann *mirrors* ki zot mete la. En keksoz, ki mon'n remarke Bel Ombre se ki parfwa sa bann laglas ki zot mete, souvandfwa dan pozisyon kot i ete si annan gro divan, i tant pou aswar vir son lekor enn pti gin.

E bomaten ler leve son *angle* in konpletman sanze. E mon krwar sa osi enportan pou *Land Transport* kapab, gete ki mannyer i kapab amelyor sa bann servis, letan nou pe koz nouvo keksoz, e keksoz ki bon pour distrik e pei an zeneral.

Me Bel Ombre, parkont Mr Speaker, i annan en kantite travay ki'n ganny fer. E parey

Onorab Georges in dir, Gouvernman ki ti la oparavan vre zot in fer en kantite semen. E Onorab Aglae, in kontan sa, in eksite lo la, e in dir poudir wi zot in fer en kantite travay lo semen, nou bezwen aksepte sa i montre poudir zot pa'n servi tou, zot pa'n servi tou larzan malapropo.

Me i annan larzan ki zot in servi li byen, pour zot kapab zisteman fer lakantite semen ki pe al en pe partou, partou ozordi. E pa bliye sa i pa larzan en parti politik. Me i larzan *tax payers money*, ki ganny servi atraver bann Lazans. E par en Gouvernman, pou asire ki bann lenfrastruktir i ganny met an plas.

Mon'n tann koz en pe osi lo bann semen Eleksyon, ki nou annan en pe partou, partou. Kot souvandfwa ou vwar ki avan Eleksyon, en semen i vini i ganny fer. Me apre i degrengole, ouswa napa *servicing* lo la oubyen napa *maintenance* ki ganny fer. Apre dimoun i kriy en pe lasasen.

Me Bel Ombre Mr Speaker, nou'n ganny zoli sirfas semen. E nou an bon kontak avek - parey tou lezot distrik - nou annan bon kontak avek nou *Land Transport*. E souvandfwa, letan nou kriy zot

i annan serten travay ki zot fer pour nou.

Be selman, pou distrik Bel Ombre nou annan en kantite proze, en kantite keksoz lo latab ki nou ti a kontan kontinyen fer pour nou bann dimoun. E ansanm avek Lotorite Distrik, ek mon *DA*. Letan nou asize i annan plizyer proze, par egzanp letan nou'n vin Bel Ombre i annan sa fame semen Carpin, en semen ki sorti dan *main road* semen, pou li antre kot bann lakour dan bann dimoun ki nou pe sey travay lo la.

En pe negosyasyon, e byento nou ava kapab anmenn kestyon pou demann Minis, pour nou gete ki zistans in arive an relasyon avek sa. Parske i annan en kantite lannen. Dimoun Bel Ombre pe esper sa semen Carpin.

Nou annan semen Amesbury ki komans anba isi kot *La Scala* i ale, ziskan anler kot Joachim Panagary, e menm pli o, pour ki bann dimoun ozordi Mr Speaker zot ariv a laz. E mwayen pou ariv kot zot, si zanmen i annan en maler, oubyen en malad, zot ganny bokou difikilte pour zot akse sorti anler lo pti semen, pour desann anba lo gran semen, ki zisteman Mosyon, pe fer referans avek.

Mon annan lafanmir Labrosse, Furneau *on top* anler. Ki zot osi bann dimoun i en pe aze. E zot santi, nou ek Lotorite Distrik, nou santi i annan en travay nou kapab fer avek *SLTA*, oubyen tap bann lezot Lazans kot nou kapab ganny bann *Grant* e ed nou dan sa travay, pou asire ki bann dimoun Bel Ombre zot reste dan sa konfor. E parey granmoun i dir, semen i sitan en keksoz enportan. E ou pa bare semen, ou pa anpese semen arive. Parske demen, i kapab servi ou menm ou.

I annan osi Mr Speaker, letan ou pran deryer *Shell*, dan distrik Bel Ombre nou annan en bout ki apel *Cameroun*. Nou pa bezwen pran avyon pou al *Cameroun* nou, nou, nou ganny akse avek *Cameroun* san okenn viza. E nou antre *Cameroun* mannyer nou oule. E Bel Ombre nou annan *Cameroun*. E *Cameroun* laba deryer, nou annan en bout semen ki anmenn nou ziska dan larantre lekol segonder.

Ki mon santi en travay avek *Land Transport* nou bezwen fer, se pour agrandi sa bout semen resirfas li byen. Annan son *crash barriers* nesaser, kont larivyer, pour ki bann zanfan, primer sirtou, avek zot paran ki deservi sa

bout semen, zot a kapab akse lekol san okenn kontrent. E okenn difikilte.

Mr Speaker, letan nou lo semen i annan osi sa ki nou apel bann *crash barriers* ki 2an pase en pe letan, *SLTA* ti dir ek nou, nou pa kapab ganny lakantite.

Parske mwayen finans, mwayen i ete. So la mon pe swete avek an mezir, sityasyon i amelyore, mon ti a kontan ki *crash barriers* Bel Ombre ki nou bezwen en kantite - sirtou dan gran kontour anler, Le Niole, i annan, nou bezwen *crash barriers*. Letan bann bis avek bann lezot transpor i kwens ek kanmarad, pour sekirite pyeton.

E osi sekirite bann drayver, ki servi semen. E letan nou pe koz semen, toultan nou bezwen osi mazin lalimyer;- en keksoz sitan enportan se lalimyer. Me souvandfwa Bel Ombre nou pa ganny difikilte bokou avek lalimyer lo *main* semen, me nou ganny en pe difikilte avek lalimyer dan bann semen segonder.

E letan mon koz lalimyer Mr Speaker, nou annan letan nou sorti *main road* kot Grand Gaz Bel Ombre, Beau Belle, nou pe koup semen i annan enn pti pon, ki ed bann kliyan, bann touris ki nou apel zot, e osi nou

lokal, nou bann Seselwa, pour koup sa pti pon pou al lo lans Beau Vallon, ant lotel *H Hotel*, avek *Fisherman's Cove*.

I annan 5 poto lalimyer la, ki tonm anba responsabilite sa de lotel. E mon swete letan zot pe ekoute la, pour zot kapab - Parske i annan en pe letan, pa pe alimen. Sa i pou vin sekirite pour zot prop kliyan ki *cross border* parfwa pou al dan enn pti restoran. E osi nou bann Seselwa ki servi sa landrwa koman enn pti *shortcut*, pou asire ki zot kapab ariv zot destinasyon.

E Mr Speaker mon ti a kontan profite, pour mwan remersi tou bann dimoun ki travay dan sa laspe semen.

E tou bann dimoun ki ede dan en fason, pour asire ki semen i ariv kot nou tou. E letan, mon pe remersye zot i annan osi pour mwan kontinyen demann zot. Nou pou kontinyen demande Bel Ombre, parske nou santi poudir, Bel Ombre i enportan ki nou kontinyen ganny sa zoli laspe semen.

Parske nou en distrik touristik, e nou osi nou bann dimoun Bel Ombre zot servi semen, tre byen. E letan nou antre Beau Belle, i annan isi anba kot laboutik vizavi avek Peter, ziskan anler kot Georges

Payet, i annan sa resirfas ki nou'n demande, ki nou swete i ava pe vini byento.

E osi anler kot Mr Ciseau, semen fini anler, Dan Bernard, tousala i bann landrwa Mr Speaker, ki nou koman Lotorite Distrik, nou'n zwenn avek *SLTA*, pour nou zisteman kapab, fer sa travay ki Onorab Georges Romain pe demande.

Pou asire ki tou bann semen - semen primer dan pei, bann semen ki nou servi i reste an sekirite, i ganny son bann lenfrastriktir neseler. Parey mon'n mansyonnen lalimyer, *crash barriers*. E osi pou asire, ki bann pon dan bann distrik, i osi ganny mentenir pour sekirite piblik.

Par egzantp Bel Ombre, *Fisherman's Cove Estate* nou'n fer sir nou'n *secure* sa pon, obor Dokter Malulu pour ki tou bann lezot dimoun i kapab servi. I annan lo *site*, kot lafanmir Pool, pou deservi bann dimoun. E la i reste sa pon letan ou ariv kot tretman delo Le Nirole, lo *bus stop*, i annan sa pon ki konekte sa bann dimoun la. Avek lot bout Le Nirole, en pon ki'n konstrir pour plizyer lannen. E ozordi i annan plizyer bann gro transpor pe pas lo la.

E nou, nou santi koman lotorite, poudir ansanm el *SLTA*, nou pou bezwen fer sa

travay pour asire ki sa pon i vin nou ranforsi li. E bokou pli gran, pour ki nou bann zabitan Bel Ombre i kapab servi zot semen byen, san okenn difikilte. Avek sa detrwa mon Mr Speaker, anvi ki ler in arive, mon ti a kontan dir avek Onorab Romain, e mon ti a kontan osi dir avek zabitan Bel Ombre nou pou kontinyen, fer tou travay neseler.

E asire ki *Land Transport* i ganny le mwayen firamezir pei i bouze, lekonomi pei i refer. Pour nou sa mwayen neseler, pour ki distrik Bel Ombre i kontinyen reste sa distrik, kot nou ganny sa bann lenfrastriktir neseler pou asire ki zot sekirite, e zot konfor lo semen i touzour ganny respekte e ganny servi byen. Avek sa detrwa mon ti a kontan remersye ou Mr Speaker.

MR SPEAKER

Mersi Onorab. Bon avek sa mon ava envit loter Mosyon, pou fer son repons e *summing up*, lo deba. Onorab Romain.

HON GEORGES ROMAIN

Mersi Mr Speaker. Mr Speaker mon pa pou long an vi ki - mon konnen letan pa dan nou faver. Be premyerman mon ti a kontan remersi tou bann Manm Onorab, dan gran mazorite, ki'n

partisip lo sa Mosyon, kot zot in fer sorti bann pwen ki vreman valab.

Mon a zis donn enn de legzanp, enn de bann pwen ki'n fer sorti. Parey sa pwen ki'n sorti plis ou kapab dir. Bokou bann Manm, in fer resorti kot zot in felisit *SLTA*, pour zot bon travay ki zot pe fer. Osi nou bann gran paran, ki'n kontribye dan devlopman nou semen.

Nou'n koz osi lo problem wayleave, pour kapab agrandi semen. Sa nou tou nou pe fer fas avek dan distrik. Osi bann antite parey *PUC* ek bann lakonpanyen telekominikasyon, merit travay pli byen ansanm pour ede amelyor semen.

I annan Manm ki'n fer sorti ki nou devret vwar plis *bus shelter* merit ganny fer. Akoz nou vwar tro bokou fanmir pe debout dan soley, oubyen dan lapli lo semen. Semen i merit vin pli *friendly* pou kapab ed bann dimoun, ki otreman kapab.

Mr Speaker i annan bokou, bokou mon ti kapab redir ankor. Me selman letan pa dan nou faver. Mon pou zis dir, tousala pou definitivman ede Mr Speaker pou donn Gouvernman opsyon ler zot pe pran desizyon e partaz resours, dan devlopman semen.

Mr Speaker, mon pou bezwen rekonnèt ki sa nouvo ladministrasyon, in fer bokou devlopman dan sa pti moman letan. Me byensir nou bezwen kontinyen pouse e amelyor nou semen, lo en pli o nivo. Parey in ganny fer resorti dan bann lentervansyon. Semen i lakle devlopman nou pei.

Alors Mr Speaker pou terminen, mon pe demann avek nou Gouvernman, pou zet en pli gran koudey lo nou semen e vwar son lenportans ki demen, ki demen nou kapab fyer ler nou get kalite semen ki nou annan dan nou pei. Mersi Mr Speaker.

MR SPEAKER

Mersi Onorab. Bon be ariv ler pour Manm vot lo sa Mosyon. Manm ki an faver lev lanmen silvouple?

Mersi mon krwar tou Manm in vote. Okenn Manm ki vot kont? Non, tou Manm in vote.

Lo Mosyon ki Lasanble i demann Gouvernman, pou revwar lapros ki semen dan Sesel i ganny konstri e mentenir, ansanm avek lenfrastruktir ki deservi semen, avek bi amelyor sekirite pour transpor e manm piblik - 25 Manm in vot pour 0 kont e 0 abstansyon. Mon annan plezir

anonse, ki sa Mosyon in pase
avek linanimite.

Bon mon a remersye bann
Manm pour zot partisipasyon, e
mon a swet zot bon
kontinyasyon lasemenn, dan
zot travay, dan zot diferan
responsabilite. Lasanble i
adjourn e nou a rezwenn Mardi
prosen 9er. *Adjourn*.

(ADJOURNMENT)